



普濟戰紀

第九冊

リ 9
6255
9




119
6255
9

普法戰紀卷十二

南海 張宗良 芝軒 口譯

吳郡 王 韜 紫詮 輯撰



普法和議既成。方謂自此可以息兵安民。畫疆自守。為善後計。而不意外難甫平。內患忽作。法亂黨之起。如蠶屯蟻聚也。嗚呼。亂匪降自天。生自莠民。雖治亂之故。關乎國運。然論世者不徒觀乎國運之盛衰。而必核乎政事之操縱。當法王乘輿陷沒。國內無君。法廷諸臣。當擇王族之賢者而立之。外以連結隣國。內以維繫人心。而計不出此。反乘間竊興。號於眾曰。民主。於是莠民之妄圖自主者群起矣。計法前後欲自立為民主之國。七十



音注法單系卷十一
餘年間業已數次。廢王拿波崙第一之先。卽以國亂無君。國中臣民共舉之爲統領。於後竟升大寶。遂擁尊號。此第一次也。法前王路易非立。寬仁納諫。甚有賢聲。徒因國人之弗悅。群起而廢之。而今拿波崙第三。遂爲衆所推戴。遽握大權。進躋王位。此第二次也。及今法王之蒙塵也。國人遂因亂廢王。不復立君。自稱民主。舉爹亞爲總統。卽聯邦之所謂大伯璽天德也。黜傅子之例。立傳賢之局。國人之意。原期一秉於公。然而法京之亂黨。由是紛起。其所謂亂黨者。卽京師內外之護勇與居民也。而其始發難端者。則民也。先是法京各鄉間。欲行保甲例。各自相轄。賦稅則由自徵。徭役則由自供。兵勇則由自出。上之人一概毋得鈐制之。籌議既定。遂達其意。

於當道。當道呈之於爹亞。夫就其說而略言之。雖似自耕自守。各相安無相擾。然稅餉所出。悉歸諸各鄉黨。而置不問。則其如朝廷維正之供何。其請於爹亞之詞曰。繼自今於京師內外。畫地分疆。各自治理。彼此毋相統轄。庶幾皆得以自主。爹亞毅然不可曰。如此則肇離散之端。而事權不歸於一。將來爭競繁興。其禍伊於胡底。亂黨見其不可。遂作難。然猶隱伏不卽發也。迨爹亞集衆於朝。議暫行建都之所。衆論紛然不一。無不各顧其私。或有謂宜在法京者。或有謂宜在多亞者。或有謂宜在波茶者。或有謂宜在來昂者。獨爹亞以爲法京見不可居多亞。殘毀之餘。百凡未備。波茶來昂規模狹隘。以吾意見所及。莫如華西路爲便。遂力違衆議。獨行已見。

而遷朝於華西路。蓋其時亂黨芽孽已萌。蔓延甚廣。方盤踞於京師內外。爪牙羽翼。布乎四周。倘一入其中。無異罪人之居狴犴。此時繫維其手足。挾制其舉動。惟亂黨之所欲爲。故爹亞以爲不可一朝處者此也。華西路密邇於法京。一旦有變。調兵進討。轉輸甚易。撲滅非難。眞老成人深識遠慮之見也。爹亞方行。叛首勉拿地振臂一呼。亂者四應。從之者十餘萬。各村亂民。無不斬木揭竿。蠢然競起。彈指之間。其亂已成。三月十八日。法京民心大震。法廷大臣遣兵往禦。捫勿特卑厘威兒浮畢晏華各處。悉撥重兵鎮守。始僅民亂。及遣護勇前往彈壓。而護勇聞變亦叛。蓋其心久爲莠民所簧鼓。故遽入其黨。而不及辨邪正也。時雲奈將軍方守捫勿特礮臺。

麾下之士。多有舍公從私者。京師郵報主局著名紳商等。見亂黨所行恣肆。無不深惡痛疾。亂黨罔恤國體。自以民主爲名。作收拾人心之計。兇威所及。執法廷職官四員。將寘之死地。須臾間。担摩士李禽皆被亂民以鎗擊斃。而囚山時克里文於狴犴。旋復釋之。法國定亂軍士與叛黨鏖戰。互有殺傷。兇鋒甚銳。勢難卽退。將軍陳亡者三人。初釁甫作時。有擒獲亂民囚繫之捫勿特礮臺者。未卽寘之法也。其後亂民爭往釋放。礮臺守兵絕不之拒。臺中所有鎗礮藥彈。任其取攜。不置一詞。蓋守兵亦心存袒亂也。臺中有一武員。貌似雲奈將軍。方欲指麾軍士。詰問其故。亂黨競前執之。衆刃交下。遂死。亂黨乃於仙河四處。排列鹿角。建設木柵。日夕布置。紛擾

異常。豪參魯地威羅殿者。法王之宮。昔日乘輿之所居也。亂黨妄思窺竊神器。居然坐據其中。僭稱行幄。一時京中舖戶。無不鍵戶閉關。通衢廣市中。勢同波沸。亂徒乘勢大赦獄囚。以資黨羽。傳檄遠近。示期於三月二十二日。公舉人員。法廷諸臣。知其徒黨已衆。勢不可遏。必不能翦之於一朝。而慮良莠錯居一處。猝難辨別也。因諭畿內民人。隨雲奈將軍。退往華西路。雲奈遂離法京。率兵四萬。通行。良民隨之者。絡繹不絕於道。并諭地方官。宜辨順逆。明是非。決邪正。毋得遽從亂黨所命。各處隘日。皆位置大礮。杜遏其來。以資控扼。法京大小郵報。無不嚴申大義。痛斥亂黨之非。亂黨聞而惡之。盡逐之出京外。惟總局日報爲官所設者。則取以自用。此三月

十八日。法京亂起之大略也。時雲奈將軍率麾下之衆。退往仙河左岸。留京平亂者。護勇而已。法廷大臣檄示通國。勸民大舉義旗。力援法京。毋俾爲亂黨所肆擾。否則法國外既創於寇。內又傷於賊。將不勝蹂躪矣。三月各路法軍咸集於華西路。以備進討。廷臣會議於行幄。皆謂上天降災。法京多故。敵人甫退。旋釀變端。咸爲之嘆息泣下。隨定議。塞仙河富士河。阻截水道。以遏亂舉。前致政大臣杜祿蘇。嘆息担摩士李禽。死於無辜。而李遺子女六人。孤困無依。尤爲慘人心目。二十一日。廷臣出示。進勦亂黨。乃執山時將軍爲質。謂如有擊我者。當先殺之。二十二日。發孚讀普相俾思麥所遺書。宣示衆民。謂法京若紊亂不已。當以大礮轟攻。俾成平壤。蓋揚

言以恐之。欲使亂黨潛自解散也。亂黨執日報主筆之士。薄待殊甚。因其秉公義以斥之也。於是日報局人。不期而集者。二十一家。皆深惡亂黨所爲。嚴詞斥絕。是日亂黨在京中。益行縱恣。居民有不服者。施鎗轟擊。立寘之死。尸骸偃仆於街衢間者。相枕藉。當官軍之始勦亂黨也。彼此搏戰甚苦。賊人力拒不退。統率陳亡者三員。旋官軍奮力擊卻之。奪獲大礮四十尊。在後五尊。仍爲亂黨不戰奪回。蓋有隱爲之袒者也。法廷定禦亂之策。謂莫如遏郵傳。絕接濟。驛遞不通。則外可靖。餉糈不繼。則內日匱。於是所有法京往遞。各處電報。無不截斷。而亂軍消息。因之中阻。畿外莠民。無有起而應之者矣。京外重圍深阻。使亂軍不得長驅而出。各處村鄉。均毋得

以食物至畿內。亂黨困踞孤城。頗艱於餉。乃勒令法京銀肆。捐助佛狼五百萬枚。以供軍需。富戶羅士齊。法京中之巨擘也。亂黨勒捐。亦如此數。皆不肯與。乃脅之以威。於是銀肆輸一百萬。羅士齊輸五十萬。廷臣中有謂此亂黨者。亦我皆法國赤子也。不如先撫而後勦。乃遣人往說。動之以利害。亂黨請立蘭加窩爲大帥。以統護勇。立亞但爲五城兵馬使。多里宴爲法京府尹。而黜雲奈阿厘路巴刺顛花連田花連諸將軍官。法廷並皆許之。卽遣蘭加窩拜命前往。亂黨問之曰。汝其以我爲護國朝廷否。對曰。此則不能。曰。若是則亦不能。視汝爲統領也。兩不相入。遂辭職歸。於是法京外卑士得番扶衣士。諸礮臺。皆爲亂黨所據。而定亂者。自此下手愈難。其

力益費。法京日報勸民殺前朝諸王子。蓋亂黨假之以言也。法京內亂如蓬麻而起。京城已爲亂者所據守。閉關相拒。華西路廷臣策所以定之。大統領爹亞號於衆曰。藐茲小醜。乃敢陸梁。若輩思欲與我戰耶。恐無能爲役也。老夫當自有妙算。俾難出此網羅。因與山時雕哥律李華魯諸將軍商。刻期於十四日內。戡平禍亂。禁糧食馬匹。無得入京。從山時將軍之謀也。謂欲攻城。不如先斷其糧道。方今京城空虛。百凡儲積。素未籌備。決不能久持。若餉匱不繼。不出一月。必至困頓。因其弊而攻之。蔑不濟矣。爹亞請於普國。調兵至北方。以清亂源。而酬佛狼五十萬以犒軍。三月三十一日。亂黨據法京城外諸礮臺。如美律礮臺華刺連礮臺。皆守以亂衆。環施

鎗礮。以示聲威。翼日。卽止不放。亂黨雖據形勝。然藥彈不敷。軍資竭蹶。器械多鈍敝。不堪用。華西路官軍知之。示期於四月二日。進兵往攻。亂黨見官軍驟至。急引兵仰攻薩地龍礮臺。旋爲官軍所擊退。兵賊戰於哥卑華鄉。官軍前隊特出精騎以躡之。所向披靡。亂黨大敗。狂奔。陳擒無數。隨卽擊斃。官軍以大礮襲其後。驅之鄉外。於是官軍聲勢愈壯。四月四日。法京亂黨十萬衆。駕運大礮二百尊。由法京長驅直抵華西路。官軍偵騎知之。立遣兵勇先據華刺連礮臺。施礮擊之。樊盛衣時薩地龍三處礮臺。其聲如雷。震霆驚。連綿不絕。所有亂黨。擒則立寘重典。防其爲變也。亂黨遍張僞示云。如有妄殺黨中一人者。卽將前日所執華西路廷臣三員誅戮。以

洩厥忿。亂黨分三路並進。以攻官軍。官軍亦分道禦之。一鼓既作。兩軍相蹙。亂黨勢銳氣猛。無一不併命相撲。角戰逾時。賊乃不支。鬩然鳥獸散。蓋亂黨衆雖蟠集。而勢徒烏合。終不敵百戰之雄師。苦鬪未幾。卽已步伐不整。行列不齊。隊亂旗靡。潰圍思遁。官軍志氣益奮。乘勝撼之。正如摧枯拉朽。陳擒一萬五千人。官軍恐留之徒種禍根。立卽以鎗擊斃。寘之死地。亂黨酋目扶羅連。按此洛俗。前日在法京圍城中。倡首作亂。欲殺社祿蘇者。旋衆散。禁之獄。亂黨自獄中釋出。收爲已助。而今日卒死於是役。雕和皆死於是役。軒厘亦被擒。法京禦亂之軍。自此愈有起色。亂黨既敗。後復思聚集兇徒。號召悍衆。再攻華西路。諸廷臣咸以爲憂。獨爹亞處之若無事。曰。今日者官軍強。亂黨弱。勢在必勝。雖衆不足爲慮。諸廷臣皆以爹亞老成謀事必

有所見。四月十六日。法京外官軍與亂黨戰於烏厘。各無勝負。華西路官軍與亂黨戰於亞司亞。大捷。徒衆奔北。如喪魂魄。四月二十六日。官軍始圍法京。嚴杜接濟。官軍施放巨礮。攻擊法京南方礮臺。將與亂黨大舉決戰。四月三十日。官軍大整隊伍。往攻法京。城中亂黨見官軍甲仗精嚴。行陳肅毅。不覺氣爲之奪。弗敢成列相抗。但紛紛礮踞城外礮臺。爲負隅固守計。亂黨舉事鹵莽。殊不洽於輿情。於法京中所設日報館。概行停禁。蓋慮清議之難容。主筆之士。從而論其短長也。黨中酋目耽巴羅士奇意。亦以爲未然。以爲民者國之所立。公者衆之所歸。今所爲如是。其能成乎。亡可翹足而待耳。於是亂黨自相爭。多有潛自逸去者。一時漸爲之解體。局

外旁觀者皆知撲滅之期爲不遠矣。亂黨酋目曰魯賒路者。頗極披猖。一切事權皆自攬決。絕不與其下一謀度也。於是居其下者。積不相能。浸有異志。或有反戈相向者。故議者謂民之生亂。法國之禍也。而亂之中。又有亂。正法國之福也。誠以亂黨自相誅夷。則官軍可以坐收漁人之獲。卽或不然。乘其一斃。討其獨存。正易爲力耳。法帥麥馬韓自普回國。仍掌兵戎。統轄軍士。駐營法京外。征勦亂黨。其得以統兵復職者。蓋麥亞特召而舉之也。麥亞最心服麥馬韓。稱其才略德行。爲不世出云。按麥馬韓前與普軍對壘。屢戰屢北。幾瀕於危。茲以創愈復出。仍長戎行。勤勞於國。蓋將才難得。不以一眚掩其大用。麥馬韓名譽久著。功績素隆。與麥亞最相友善。

坐鎮阿洲。以遏亂略。英國阿爾蘭人敬仰之。幾比於泰山北斗。前麥亞欲借外兵平亂。亦爲救急目前之一策。日耳曼已如所請。願爲之助。屯於法京外。將與麥馬韓同時進攻。將出師時。麥亞奮勉其衆。期以速滅亂黨。勿致重困我民。五月八日。出示檄告國中曰。蠢茲亂逆。暴虐是作。所過殘毀。騷然不靖。妄稱義舉。毒痛我民。所望法都人士。明順逆之故。辨邪正之幾。惠然來歸。脫茲苦厄。不佞忝居民上。見我民淪陷於賊窟之中。甯不愴焉。痛心力圖拯拔。初時官軍進勦。但攻礮臺外地。今則非出不得已。攻及礮臺。但法都內地。斷不忍遽行焚燬。業經下令軍中。僅攻一門。諒大兵雲集。亂民必走且降。蓋兵多於賊者。幾於百倍。用特布告汝衆。若爲法國良民。當

於大軍至日。簞食壺漿。爭先迎款。開關延納。以迓王師。庶免玉石俱焚。不至莠良莫辨。而郅治隆平。從茲可復。嗚呼前災既弭。流禍勿長。共樂綏安。咸與生息。是所冀於汝等者也。亂民甫見此示。卽曰。此將渙我人心也。因銜爹亞甚切齒刺骨。無不欲得而甘心焉。立懸一檄。答之云。惟聖人能一怒安衆。惟仁者以大義興師。安衆先在衛國。興師尤重保民。茲已公立朝廷。名曰保民而衛國。凡屬蒼黎。時縈宵旰。此心所發。薄海咸知。若爹亞者。則言行相違者也。彼謂不遽攻擊法京。胡爲今朝夕間。無辜婦孺。時多殞命於彈丸。宛轉死亡。慘不忍觀。蓋彼外托寬仁之名。內懷篡逆之意。實欲從此而入法都也。今將爹亞屋宇。立命剗平。汚其宮。而瀦其室。用彰撻伐。

以志奸邪。將其所有產業一概充公。雷厲風行。刻無容緩。現委大臣二員。司理是事。緣此布告。爾民各宜自奮。毋爲僞忠僞義所惑也。可。亂黨遂遣衆毀爹亞府第。頃刻間。畫棟雕甍。盡成瓦礫。第中所有。悉沒入亂黨私橐。劫奪一空。有從逆富戶。特懸重賞。購擒爹亞。謂有能生致者。立畀金錢四萬磅。或謂此富人者。何所憾於爹亞。而獨爲此快心之舉也。時亂黨兇燄張甚。擬發拿波崙第一之陵寢。暴其尸於市中。勢甚洶洶。爹亞聞亂黨所爲。憤甚。曰。吾將使子孫世守此赤地。以誌不忘。誓必滅此而朝食。定不與逆虜同生也。五月十五日。進兵攻據城外樊華礮臺。是礮臺地當衡要。正不啻扼其吭。而制其死命也。於是亂黨震恐。盡爲膽落。官軍乘勝環攻。

奪取門道魯治礮臺。亂黨為官軍所困。危若朝露。五月二十二日。官軍以八萬人。攻入法京。取悍黨六百人。悉誅之。鼠竄狼奔。有同瓦解。是時亂黨大勢已去。雖有餘孽。殆不足平。正如破竹。數節之後。當迎刃解耳。亂黨知事不成。乃縱火焚宮殿。一時如條拉厘。王宮魯華宮。附近鉅院。盡燬於火。都成焦土。烈燄上騰。天為之赤。當華西路定。亂官軍初次進攻法京時。有主筆之士。隨軍紀錄云。斯役也。官軍併力同心。向法京邁征。聲勢之捷。逾於風雨。亂黨不自量力。妄矜螳臂。出兵相禦。戰於都外平壤時。有我國星使崇公。崇公滿洲人。名厚。字地山。駐車師華河橋上。以遠鏡觀戰。遙見兩軍行陳環列。旗幟繽紛。進退勝負。頗為了了。又見法京西南隅。火光燭霄漢。甚遭蹂躪。蓋亂

黨不獨焚燬宮闕。卽官署民廬。亦不得免。甚至達衢中紀功之碑。銘勳之柱。無不摧殘槌碎。以為快。亂黨擒天主教中大主教德丕羽。寘諸獄。其人職位尊顯。專為國王司宣講者。以下又獲神父教士六十九人。初執時。謂特取為質。將與官軍議和。後卽釋之耳。五月二十四日。時已夕矣。亂黨特命司獄里富伶西士。自獄中取之出。銀鐺桎梏。環繫其手足。令驅之於市曹。行刑沿途觀者。多為嘆息泣下。亂黨肆口斥詈。恣行凌辱。紛囂之聲。不絕於道。自以為恭行天罰。一似若輩罪無可逭者。比至刑所。施火鎗。先擊亞辣神父。次擊德丕羽大主教。其餘次第誅夷。無一免者。兇殘慘酷之禍。古今所未有也。亂平。法

廷臣、追念牧師教士等生前言可為坊、行可為表、因亂捐軀、殊堪憫惻、爰以禮改葬之、 國中送葬者、車馬殷闐、不絕於道、時我國崇星使、已由華西路、遷往法京、亦往觀焉、

亞出示諭民云。茲者官軍已全據法京。勦寇安民。俾汝等復覩天日。所未下者。僅屬一隅。賊黨負隅抗拒。特求緩死。須臾耳。卽當刻日進攻。悉歸掌握。魯華宮殿。雖經逆燄。所摧殘。幸撲救未遲。猶得稍存結構。尙有址基。戶部衙署。半燬於火。列國公使行轅。概成焦土。現已擒獲賊兵萬餘。不久卽盈二萬。賊尸枕籍街衢。我軍死喪無幾。戰勝之威。以此可見。各軍忠勇可嘉。定亂膚功。不難奏於卽日。寇氛之靖。余懷斯怡。我思及此。雖歷艱難。克弭禍亂。寸衷之苦。猶甘如飴。汝衆勉之。庶以共迓天休。亂黨自城逸出者不少。多竄至華西路。爹亞行幄所在。其地正扼要衝。距京殊近。自五月二十一始。至五月二十七。日。擒獲亂黨三萬人。多係婦女。凡被執者。悉寘重

典。無一得宥。二十七日。於城中窟室內。搜得死者五萬餘人。皆係婦女童穉居多。蓋當官軍攻城時。礮火連天。轟聲震地。崇旃廣廈。轉瞬傾頽。婦人孺子。苦於無可逃避。乃相率匿於窟室中。聊延殘喘。顧兵賊相持。非止一日。室中別無長物。久不得食。無不宛轉垂盡。於是不死於兵者。乃死於饑。城中閉關絕食。忍饑待斃者。幾於擢髮難數。爲可哀也。官軍前後擒獲賊衆甚多。獲卽擊殺。極形殘酷。兵刃相接。殺人如麻。積骨成邱陵。流血成溝澮。焚燬廬舍衙署三分之一。法京富麗甲天下。歐洲之中。殆無與埒。而一厄於外患。再淪於內亂。遂致樓臺鞏壯。悉化飛灰。士女便娟。慘成枯骨。殊令人目不忍見。耳不忍聞。兵猶火也。弗戢自焚。有識者早爲之嘆息。然不

毀於敵。而竟毀於賊。此其中亦有數存焉。五月二十八日。亂黨悉平。謀叛者咸正典刑。脅從者概予誅戮。前後共殺六萬餘人。是日城外居民聞此消息。無不額手慶賀。交相慰藉。自晨迨夕。未聞礮聲。各處之火亦皆撲滅。餘燄盡熄。時普魯士戍兵屯於綠遷威。擒獲賊黨千人。中有婦女。手執軍械。亦能臨陳決戰。凡有賊黨過普魯士軍界者。悉遭俘繫。盡去其器械。定亂法軍之勦賊也。過於殘酷。所擒無論婦女童稚。苟持械於手者。立置死地。無一毫憐憫心。亂黨既平。匪徒盡戮。京師內外歡喜異常。咸以爲指日可觀昇平矣。五月二十九日。俾厘威魯賊黨尙與官軍相持。苦攻力拒。轉鬪良久。卒爲官軍所勝。各鳥獸散。擒得亂黨。概治以軍律。用鎗擊殺。每次

以五十人。或至一百人爲一隊。火鎗所擬。潰腸洞腹。碎首裂腦。誅戮亦殊慘矣。於時城門出入。譏察綦嚴。城中居民無大帥麥馬韓路憑者。概不準出。曾在亂黨中爲統領魁目者。擒悉殲之。無赦。三十一日。浩爹的威兒地方。尙有餘孽。爲官軍搜獲。置法者三十三人。中有七人。則係女子。皆反繫其手。同跪一處。燃鎗擊殺之。當第一次發鎗時。有女子三人。已傷而仍未死也。其宛轉垂絕之狀。殊爲目不忍觀。迨第二次發鎗。亦仍未死。最後至第六次。乃始氣絕斃命。說者謂亂黨之以女子從軍也。殊勝於男子。其臨陳從容。決機猛捷。皆剛健中含婀娜之氣。非及笄之姝。卽待字之女。力強而氣銳。其鳴鎗發礮。嫻熟而敏速。雖久歷疆場之士。無此精練而坐作進

退。動中肯綮。步伐止齊。不違繩墨。使稍加訓演。真可為
 節制之師。初不意以女子之微。而竟有此妙用也。使此
 女子深明大義。為國宣勞。則足以流光史冊。馳譽寰區。
 而惜乎其舍順而從逆也。官軍定亂之時。此等女子。罹
 鋒鏑。而膏斧鉞者。已不知凡幾。擒於陳者。二千八百人。
 審訊之際。顏色不撓。自供法京之一炬。由彼所為。然則
 富麗名區。繁華勝地。累朝法寶。異國珍奇。悉付之於灰
 燼者。多出此輩為之肆虐也。官憲執法定罪。即將所擒
 女子。遣發紐加烈頓尼埠。充軍以肅典章。而清兇孽。日
 報主筆之士。曾親見此等女子云。嗚呼。其亦戾氣之所
 鍾歟。官軍之治亂黨也。嚴。凡有人詣營。通報某曾作賊
 者。立即往捕。苟其人逃匿不出。搜得後。即殺無宥。不復

辨訊。其地尸骸枕籍。雖經掩埋。猶有餘臭。法京流離情
 狀。實為慘目傷心。當官軍攻賊時。日殺五六百人。其未
 經瘞理。暴斃於風日中者。尚有五六萬人。大兵之後。必
 有荒疫。此時穢濁之氣。熏蒸遍聞。恐將來疫癘之降。所
 不得免。嗚呼。罪人斯得。貴乎情真刑當。俾國法得伸。頑
 民知警耳。多殺何為哉。

四郊多壘。烽火流離。已非向時比矣。不謂敵人既去。而又有亂民之殘孽也。法民之厄運可謂甚矣。法京之亂。至五月二十八日始平。當倉皇擾攘之時。官軍奮力進攻。用巨砲連環轟擊。砲火雷殷。鉛丸雨驟。幾於玉石不分。城中屋宇衙署。焚燬者約四分去一。婦人孺子奔避無所。羣聚於窟室中。兵賊久持死者。遂衆。室中別無長物。久不得食。無不飢餓至斃。宛轉待盡。官軍之攻賊於城中也。自五月二十一日始。前後擒獲匪徒二萬餘人。最奇者。其中多係婦女。娘子從戎。原為忠義激發所至。而此則甘從叛逆。甚不可解。賊黨之逃於邊緣威地方者。悉為普魯士戍兵所擒。約一千餘人。其中亦有婦人。且擐甲執兵。銜鋒陷陣。其勇健絕倫。無殊於男子也。緣威駐有普魯營。用以屯兵。鎮守為定。亂官軍之聲援。法國之官軍。擒獲亂匪。立行格殺。即婦人孺子。亦悉戮不宥。或有議其過於慘刻。則曰。謀叛之人。例在不赦。不戮何為。統計前後所殺。不下六萬餘人。幾於血流成河。尸積如山。五月二十八日。官軍攻入城內。之偏隅。亂黨猶復巷戰。短兵相接。殊極無算。亂黨既平。然後命人撲滅火燄。冀除宮闈。於時內外悉靖。鎗砲之聲。止而不作。幸存之民。老弱男婦。無不欣欣然望治。曰。今日始得復觀天

日矣。事定。遍搜民屋。中倒斃尸骸。縱橫枕藉。不可勝計。約五萬餘人。皆婦女童稚。其情形之哀慘。蓋有言者。之酸鼻。而聽之傷心者。溯法自開國以來。未有如此之巨劫者也。嗚呼。豈不哀哉。

法國亂黨。芽孽盡除。有就波路斯奇者。法國之蒲盧地方人。偽大元帥也。官軍攻入賊巢。搜捕餘黨。就酋猶率其羽翼爪牙。併力拒角。相持久之。就酋為流彈所傷。乃躍馬潰圍遁去。普軍截之。不得脫。遂被執。囚之於顛尼士礮臺。餘黨之逃竄他國者。發孚移文。前往拘拿。亂黨中有偽將克刺沙者。兵敗思逃。為普軍所止。今亦在被俘之列。寘之獄中。當官軍之破入賊巢也。賊兵死命相撲。大帥麥馬韓親督諸軍。躬冒矢石。轉戰甚力。官軍大呼馳擊。無不以一當十。賊黨盡靡。刳之如羊豕。縛之如雞鶩。內外賊黨。賴以肅清。是役也。麥馬韓之功居多。語云。失之東隅。收之桑榆。如麥馬韓者。其亦可謂前愆

而晚蓋矣。麥馬韓麾下軍士。約三十有八旗。既平亂黨。後群唱凱歌。而還華西路。時麥馬韓行帳。駐於彼也。當凱旋時。行列整齊。軍容壯盛。折花枝插於鎗尖。以示誇耀。論者謂法國戡亂之役。麥馬韓之勳爛焉。嗟乎。此非前日之麥馬韓哉。雖普軍之與亂黨。不可相衡而並論。然使麥在當日。得以盡用其才。法之軍務。不至於僨蹶。若是之甚也。觀於往援蔑士之役。則可知其故矣。當兵部門韜賓。遣麥往援蔑士。麥曰。普將深諳韜略。此謀實不可行。門韜賓不從。遂至於敗。麥之明於料敵也。蓋如此。當蔑士既敗。麥常獻策於法王曰。蔑士之戰。我國家不幸。師徒撓敗。銳氣盡墮。敵人乘勝深入。進逼沙龍。勢難繞出其前。以收遏截之功。則宜先固根本。為持重不

拔計集未經挫析之師還屯法都之外蓄養精銳布置
 守禦控扼要害杜塞水陸俟普師甫至卽行擊之此以
 逸待勞之法也麥馬韓是策實爲要著惜法王之未能
 從也按此時法王大權旁落一切皆兵部門轄資爲主其後普軍果因屢捷之餘威席捲
 長驅直抵法都得以築壘安營如入無人之境由無精
 騎重兵以扼之也然則麥馬韓之所策亦可謂善審敵
 情者矣惜乎將將者不用其所長而反用其所絀於其
 言之宜用者不用言之不可用者反用之則雖有孫吳
 之略亦無所施其技矣是豈得爲麥馬韓之罪哉或又
 謂褒巴奇亦法之名將也其致敗之故非戰之咎所部
 之兵雖稱八萬而可用者僅三萬五千耳况乎蜚語危
 詞流之自上觀其憤欲自裁一節雖不獲死亦可明其

素心矣使用以堅守蔑士則其毅然不屈之志豈屑出
 降夫以天下第一堅城竟不能守委而去之徒藉口於
 子輿氏之一言曰地利不如人和亦殊可惜已故蔑士
 而不遇褒巴奇則地失其險褒巴奇而不守蔑士則人
 失其才乃竟以剛復自用之巴彥處其間而國事遂至
 於不可問用人不得其當斯則法國之不幸也夫因論
 麥馬韓事而併及之亂黨發難於三月十八日而滅於
 五月二十八日約略兩月餘麥亞於亂事之興卽以爲
 賊不足平蓋麥亞老謀深算別具深心視醜類之鴟張
 狼顧曾不足動其胸臆竟得指揮談笑成戲亂之勳非
 裕之有素安能若是哉以視巴彥之守蔑士拒普師自
 謂有奇計足以破敵竟至束手受制徒托空言相去奚

雷霄壤。嗚呼法國外患甫寧。內憂踵作。劫灰方燼。焦土堪憐。疇昔盛隆。誰能迴首。其不至於一蹶將覆者幾希。猶幸廟堂決策。揚總冢之明威。帷幄運籌。奮元戎之神武。六軍齊發。拔幟先登。萬馬不嘶。銜枚疾走。鷹揚之師。矯矯魚麗之陳。堂堂虎帳驍軍。爭擒鼠輩。龍城飛將。直搗狐群。從天而降。將軍刻日。而殲雌冠。克救大難。迅奏膚功。從此撥亂反治。休養太平。又可為法國慶矣。是役也。法國勤王之師。進圍法京。平亂戮奸。殞身於疆場者。亦殊不少。計陳亡官弁八十三人。受傷者四百三十人。陳亡兵士七百九十四人。受傷者六千有二十四人。其兵士之散亡於外。無可稽考者。一百八十三人。此據麥馬韓所列之數。然則授命捐軀。忠於王事。亦可嘉已。

逸史 王氏

韜曰。法京亂黨。自始事以迄卒事。被戮於官軍者。約十有餘萬。婦女童稚。皆不得免。推原其致亂之由。則皆因自主二字害之也。方法國廷臣之轉為自主之國也。民間嚮然。皆以為自切。箇揭竿競起。明知勢不能敵。法京斷不可守。但願與城偕亡。其定意將一城之繁華。盡付之灰燼。然後其心乃快。是以一炬所經。連成焦土。城中房舍衙署。三分損一。焚時悉以橫強水。傾其中。其餘愈烈。一時難以撲滅。官軍破城而入。火燄燭天。所擒賊黨。不及以次誅戮。盡驅之入火中。擒得婦女。有不肯行者。即倒曳之。或即擊之。以鎗死亡之慘。目不忍視。嗚呼。謂非自主之一念。誤之哉。亂黨所焚宮室。如條

刺厘宮。豪爹的威兒宮。戶部公署。悉成灰燼。焚時亂黨傾以石油。棟宇參天。燬於頃刻。惟魯華宮得以撲熄。餘火。然已半經焦灼。不及魯靈光殿巍然獨存矣。宮廨之外。如雲耽哥林牌坊。亦為所毀。按條刺厘宮。建於一千五百六十四年。為格連窩富勿特西士所剏造。規模制度。稍亞於魯華。然縱橫開廣。閎敞異常。地處仙河之北。始基孔固。外飾未華。至顯理第四時。漸加增拓。頓改舊觀。迨路易第十四。復加恢廣。相傳至今。三百餘年。溯其

版築之初。乃特以備法先王梅黎窩富勿地西士起居者。第以未愜於宸衷。罕逢遊幸。至路易第十四在位時。雖有改作。而亦非經常御。路易十五以冲齡嗣服。阿連公爵攝行國政。於此受朝賀。頒條教。路易十六大權旁落。被廢失位。卽於此宮躬受大臣廷訊。延及拿波崙第一。恒居其中。自此北方結構日隆。漸與魯華宮首尾銜接。後繼位爲王者。皆以爲正寢。一千八百三十年。路易非立。在位。國中。大亂。其黨矜擁立之功。遂據是宮。一千八百四十年。亂黨廢王。路易非立。遂於是宮。出奔英國。諭以是宮居廢疾之人。蓋憤亂黨之久行盤踞也。歷代以來。崇美飾華。遠勝於昔。其宮深一千有八尺。廣一百八尺。其中層樓複閣。邃室洞房。萬戶千門。幾於不可指

數。宮門外卽向奇列士特拉干葛。爲都中游玩廣場。王宮峙其東。鉅院翼其西。危橋通其南。大街接其北。別開勝景。洵號名區。尤足以擅一都之形勝。王割其三分之一爲禁地。以鐵欄爲之界。而守以禁旅。外環以池。固若金湯。凡宸居所在。其上則懸大纛。使民間一望而知王在官中也。若乘輿他幸。則否。遠人之欲瞻覲王宮者。可先謁其國之大臣。乞其名簡。卽得入覽。然必俟王出始可。禁地以外。例許民人游眺。嘉木千章。扶疎蔽蔭。夏日坐憩者。幾不知有盛暑。是中臺沼陂池。林樹花卉。禽獸蟲魚。無一不備。宮之東隅。亦爲廣場。而國家所設總習藝院。正與毗連。院名魯華。東西南北。皆有門。四通八達。崇閎鞏麗。足與王宮並峙。相距不遠。又有巴列士萊亞耳

院。院立基於北。而於東西。傳以兩翼。直達通衢。正如鳥
之振翮。院後復建大樓。高峻宏壯。全用白石築成。晶瑩
耀目。屋頂俱用玻璃。朗徹無垠。纖悉畢見。樓左右。悉市
廛屋宇也。列肆櫛比。珍貨錯陳。樓前闕隙地。為園。廣袤
無際。長七百尺。廣三百尺。園四周環峙。廣廈麗棟。崇臺
珠聯璧合。幾於一望連雲。齊歸一律。其間皆係酒樓茗
肆。佳肴異饌。芬芳外溢。客至一呼。叱嗟立辦。其別肆之
相連者。名品異果。充牣其中。以供游人之燕娛食息。都
中士女。每日往來如織。甚至足無停趾。車無停軌。其地
羈客旅人。聯鑣接軫。而至者紛如也。皆以其地為勝境
大觀。或且以不得一游。為缺典。逸史氏王韜曰。同治庚午春初。余將自
泰西。由英抵法。取道於法京巴黎。

斯一作三日。游往瞻王宮。環歷幾遍。其宸居之壯麗。土木之窮奢。物力之富庶。慶市之繁華。誠
可謂歐洲之冠矣。乃不意不一年間。遂等咸陽之一炬。物盛而衰。殆其變也。撫銅駝於荆棘。

閱浩劫於滄桑。而不勝歎息。耳。魯華宮亦即前日法王之離官別館也。後乃

改置為公廨。歐洲宮殿壯麗。當推法都。而其中尤以魯
華為最著。溯其創建之初。原為前朝王者獵較之所。始
拓為圍場者。勇士得高弼也。圍中築一樓宇。為憩息所。
於是縱鷹走犬。射毛飲羽。四時不絕。其地多長林豐草。
於乘輿未至之時。樵夫牧豎。時亦涉跡其中。無所禁也。
一千二百四年。法前王非立窩加士得。就其地之形勝。
略加規拓。建築礮臺。名曰魯華。一時氣象森嚴。藩籬鞏
固。稱為要地。凡王族中有跋扈不臣者。卒囚於此。等諸
天獄。迨查魯士第五。而其地機局。又為一變。爰建宮室。
土木大興。雕梁畫棟。櫛比雲連。別建一樓。寶藏典籍。傑
構臨風。聳接霄漢。樓中收貯卷帙。甚富。埒於蘭臺石室。

縹囊綠綈。玉軸牙籤。不可勝記。悉係珍函秘笈。世所罕
觀本也。此爲魯華宮貯書之始。扶蘭西士第一在位時。
雅好宏麗。命良工繪圖。以爲他日營造張本。其命意所
在。務求盡態極妍。不惜金貲。不限時日。故經築三百餘
載。始慶落成。此魯華宮之所由來也。自此時有擴充增
美飾華。日臻富備。每一王立。無不加意布置。入其中者。
但覺金碧輝映。光彩炫目。綺錯繡交。莫名其妙。核其建
造之費。河沛山積。至拿波崙第三。工役始畢。於時方與
條刺厘宮。如振翼之相連。先是兩宮位置之所。各峙一
方。不相聯屬。經歷代增建。始合兩宮而爲一。蓋其匠心
獨運。財力幾殫。殆不得以尋常土木視之也。一千八百
五十七年。特勒石額。以紀其盛。一千五百四十一年。扶

蘭西士第一。建魯華宮。一千五百六十四年。格得連窩

富勿特西士建

按格得連係法之女王。建後女王馬利亞。亦時居此。最後遂爲拿波崙所常御。

條刺厘宮。一千

八百五十七年。拿波崙第三。令兩宮合一。積數世之經
營締構。物力貲財。乃始有此。固非他國之所能頡頏比
擬。其繼扶蘭西士第一而起者。路易十四也。增構宮室。
窮極奢麗。徧徵天下名匠。爲之繪圖。一時之欲蜚聲著
譽者。群赴焉。有卑羅者。中選而仍未用。又以重幣。至以
大利徵班年尼。來法京。爲之經畫總理。而詔卑羅贊襄
其間。班年尼以此功。遂食精祿。終其身。李布倫以畫名
一時。宮中所藏。多出其手。佐哥林又爲選擇古今名畫。
兼購覓四方珍奇玩好。以備儲蓄。自此法京宮殿。遂著
名於歐洲。豪爹威厘院。一名惟利酒樓。前德祿蘇爲國

民公舉統領時。卽於其中讌飲。迨後富洛伶作亂。德祿蘇方在院中集議國事。遂爲所執。旋幸得脫。其地在孛列特兀黎園。亦近特拉干葛廣場。與條拉厘王宮相距無數百武。其屋作正方形。東西南北四周皆啓門。以通出入。塗飾煥麗。殫極人工。國王顯理第四銅像居其中。四壁悉供巴黎斯名宦遺像。俱以白石琢成。玲瓏工緻。鬚眉畢肖。在法京中華美著名。顧亦同燼於劫灰。殊可惜已。說者謂當拿破崙第三全盛之日。於此受朝賀。接群臣。一時之覲龍光。凜虎拜。瞻望闕廷。對颺於殿陛間者。無不以爲榮。其值良辰佳節。稱慶臚歡。亦於其中。開勝集。設華筵。燈彩連宵。笙歌徹夜。其所謂冠裳之會。簪紱之游。壺觴互酬。履舄交錯者。無非天潢貴胄。上國名

鄉。宮壺賢媛。世家姝麗。下此者。亦惟遙望宮牆之外。流連躑躅焉耳。豈得厠屣跡於其間哉。更有歐洲列國之君。來修玉帛之好。亦於此行。兩君相見之禮。笙鏞酒醴。宴待攸隆。往年我國星使蒲公安臣。志公剛。孫公家毅。曾蒙法王所召。往觀躍舞。一時集者不下千人。劍佩鏘然。麝蘭馥若。中外聯歡至此。亦前此未覩也。法王於普釁未構時。虎視諸國。戰勝攻取。舉重若輕。每於殿廷中。宏敷訓諭。衆皆側足立。側耳聽。幾以爲一言爲福。一言爲禍。視其喜怒。爲安危。得其褒貶。爲榮辱。曾幾何時。外患猝作。大命忽傾。六飛空淪。乘輿不返。法后亦由此出奔。盛衰無常。已足深人歎息。更不謂外患繼以內亂。舉三百餘年之華構。十數代之珍藏。幾於盡成灰燼。述論

至此。能不令人蕭然意索。嗚呼繁華如夢。治亂轉圜。仰視銅龍。倍感先朝遺物。還瞻玉壘。依然法國雄圖。是在法廷諸臣。有以扶衰起弊耳。雲耽石柱者。法京中古時遺跡也。泰西諸國於街衢中。建柱築亭。以銘功德。猶中國之勒碑建坊也。雲耽石柱。甚巨偉雄峻。其高參天。上銳而下大。四旁多刻奇字。千百年物也。矗立於達衢之中。萬目瞻仰。固大觀也。溯此柱之立。其由來遠矣。初法民建一石柱。柱上置法王第十四像。乘馬獨峙。容貌雄毅。用以志王之功烈。後至一千七百九十二年。法國內亂起。遂爲莠民所毀。越十有四年。拿破崙第一興。思所以復之。時方用於兵歐洲列國。一千八百四十四年。伐以大利勝之。遂入羅馬京城。取地里仁石柱。歸於法京。

輦運之費不貲。如其式建立於當衢。其柱共高一百三十二尺。用以壯觀瞻。而矜功伐。鑄鐵欄以圍其外。行人過者。無不仰瞻歎異。初建之時。拿破崙欲立沙厘文之像於柱上。王之左右尼之。并欲媚王。勸王立己像於其巔。迨至波般朝。有好事者。謂拿破崙王今已廢矣。何用彼爲。遂取其像下。而升一白旗於柱巔。以爲波般朝中興之兆也。至路易非立嗣位。欲表彰先王之功。以爲拿破崙第一。征伐之勳。赫然震耀列國。不可沒也。復立其像於上。旋又爲民所取下。於是石柱之巔。空無所有。蓋在羅馬城中。其上固無像也。一千八百七十一年五月十六日。夕間。亂黨議欲毀之。京中有米利堅人之寄居者。聞是消息。願以重價購焉。求其完而勿毀。亂黨不

可。卒以長繩百尺曳之。倒而槌碎之。法人於既毀後。爭取其零方斷塊。度之篋笥曰。將以誌古跡也。情亦可憫矣。夫物之成敗。雖有數存。而以此千百年之古物。竟不克長保。亦殊可惜。然則所謂泐金石而壽山河者。正復不可恃耳。或曰。此柱之毀。蓋高拔爲之倡首也。先是普圍法京。危逼萬分。法人高拔目覩創痍。不勝悲憤。乃上書於統總曰。竊聞性謙則益。志滿則傾。故物速成者。必疾亡。晚就者。乃垂遠。此理勢所必然也。曩者拿破崙第一。藉將士之用命。戰勝攻取。雄冠歐洲。兼併弱小。鞭笞強大。此實大法國救世之主。在天之靈。有以啓之。乃彼竟貪天之功。以爲己力。不思翼翼蒞民。聿修厥德。更欲誇榮耀武。自伐其能。自以爲創立不世之勳。不可不彰。

名物。以示不忘。遂高標銅柱。而置己像於上。志驕氣揚。於此可見。是以精誠未格乎蒼穹。流澤不加乎黎庶。一旦天命既去。大權因而旁落。彼妄思名顯當時。德彰後世。而不意禍及其身。竟至於去位失國。此易所謂鼎折足。覆公餗者也。迨今後嗣王。不能一反舊政。克蓋前愆。而其所爲。更有甚焉。以致上千天怒。下失人心。人與之怨。家與之讐。湖厥由來。可見禍生於有胎。而害形於有象也。茲者敵勢方張。國家多難。正義士立功之會。英豪勵志之秋。然獨夫雖廢。而亡國之物。尙存於衆人屬目之地。向日欲以此誇示遠邦。徒增歐洲之玷辱耳。今民瞻視及之。益深切齒。况今新朝承天繼起。必當掃除舊跡。盪滌穢聞。銅柱之樹。所宜急毀。一以戒驕慢。一以節

奢華務使我民相勵以仁信相守以禮義將見退敵之方不恃此堅城之可禦而在衆志之克完斯亦轉禍爲福易危爲安之道也書既上不果行及內亂起高拔首先糾衆毀柱時有法人用照影法盡繪舉事諸人羅列紙上鬚髮畢現事平更復廣爲摹印俾官軍各持一紙遍緝國中人。有與畫中相同者立即執之赴官以抵厥罪。而高拔卒不得免哥林坊亦名北治士亞符干葛鐵室亦在衢路間法先王拿波崙善於用兵戰功無敵於天下其征伐歐洲列國所向克捷屢欲專建一坊以彰法軍戰勝榮威一千八百五十年法國勝俄勝奧於暗士威盈拿奪獲大礮一千二百尊盡鎔其鐵以鑄一坊高敞宏固古無與埒牆壁窓檻榱桷棟柱無非用鐵鑄

成輪奐悉雕刻花卉鳥獸精緻細巧室外圍以鐵欄欄上纍纍懸繫者悉玉冕也殆不下千百計其冕或以雜綵編織所成國中士女所貽者也西國例凡有功者得加冕今懸冕所以旌軍士之功而念其勞勩也謂若非軍士力則不能宏戰勳得敵器至於如此五月十六日亦爲亂黨同時槌毀惜哉逸史氏王翰曰余往年經巴黎時嘗過而入覘河並壽而不意不轉瞬間亦復燬於兵燹化為烏有不可勝歎哉亂黨既平庶務粗定法廷諸臣夙夜贊襄善後事宜歐洲列國公使悉回法京駐筭於時京中居民安堵如常流離播散者加意撫集仍回故土塵市復開農工商賈皆各安居樂業有欣欣思治之心故京師氣象漸有可觀法廷議於民間先貸八十兆磅初欲借一百兆磅後改八爲善後事宜之用

而尤急者。則在酬償普國軍餉一端。計普國戍兵之留於法境者。其數尙衆。一切芻茭糗糧。皆法人爲之供給。所費浩繁。幾不可以計算。於五月中。須撥交三千萬。故此先行籌備。以爲有恃無恐。其貸銀之法。按地料派。務極均平。而泯偏枯。斯令既下。法人踴躍樂輸。所捐之數。遂至盈餘額外。亦可見法民之急公好義矣。爹亞之室。前爲亂黨所燬。瓦礫荒涼。無復草木丹青之盛。爹亞於亂離之後。觸目傷心。曠然遐想。決無復事經營之意。上下議院議。俟善後事宜稍有就緒。卽爲爹亞復建府第。爹亞固辭不獲。至是撥佛狼一百五十萬三千枚。重爲締造。鳥革翬飛。煥然一新。其規制增拓。有逾於舊。於以見爹亞爲國忠誠。炳於日星。而逾於金石。故能爲人心

所歸如此。亂黨之毀之者。欲以辱之。不知正以榮之耳。六月九日。自法京至各郡邑。所有文移驛遞。往來迅捷。仍如舊時。法京道路。久已梗塞。至是復通。法國經費。不足議於入口絲斤。加徵稅餉。於每百金。抽取二十。亂逆餘黨。竄匿境中者。特諭地方官。加意搜捕。以清芽蘖。日耳曼索取法國酬項。於均償各邦外。其被擄商船。亦在設法補苴之列。茲經麥連畢戈添畢等數邦。群集議院籌商。凡日國商船。無論貨主舵工。有爲法國所獲者。卽於此項中。秉公酌給。其已賃船置貨。因阻兵而不行者。俱酌量賠補。至於多寡之數。由議院設立人員。妥爲核斷。久之。普國朝廷。議將法人所償軍餉。悉行參酌支給。其預備衝鋒禦侮。以爲他日招集兵馬費項者。則用爹

刺士四十兆。其爲久安長治。爲國家有備無患之遠圖者。則用參刺士二百四十兆。至於各處城垣。凡被攻毀者。悉議葺補。其於士打拉士卜城。則撥佛狼五十兆九十萬。其於宣威城。則撥佛狼三百萬有奇。其於薛士達城。則撥佛狼二百五十萬。其於布里索城。則撥佛狼一百三十萬。其旅法之日耳曼人。被逐出法境。以致流徙之慘者。則撥佛狼七百萬。以資周濟。至於普商貨船航海。而遭法軍劫掠者。均議補償。其他如民間之車馬貨物。糗糒衣裝。當時入官。以供軍用者。悉予調劑。概照價值。無致偏枯。此外所餘銀項。及歲中納息。則盡以頒賜日耳曼出征將士。或多或寡。悉按人數均派。務持其平。前有英國煤船六艘。泊於法境仙河。普人恐其有阻於用。

兵也。以礮擊沉之。英國索償船煤價值。普人議賠金錢七千七十三磅。五月九日。由英國駐普公使。交割於英。

其事以寢。

一說普國所償之項。英商堅不肯受。蓋以貨船之值。不止此數。且謂昔者普國總兵。業已願償金錢一萬五千磅。而我國未之許。豈有昔之多者。尙不肯

受。今之少者。乃反受耶。因是事中止。將來如何歸款。或不免兩國議政院。爲之調處云。

旅入京。初普王率師凱旋。久已駐營京外。普法和議未定。兼以法京內亂未平。故遲成飲至告功之禮。至是始舉行耳。是日普國京城。結彩懸燈。燦如叢錦。士民之前來瞻仰者。踵趾交錯。無不欣欣然有喜色。日亭午。始整隊入城。第一隊。則未出征之將士也。統隊者爲大帥。冷枝路。執元帥大纛八十一桿。幡旗繽紛。迎風蕩漾。皆戰時奪之於法國者。蓋斬將擣旗。功在首錄也。第二隊。則兵部署中官員。大小前鋒官員。大小統兵官員。第三隊。

則麥蓮畢公爵塞慎尼王子大將軍士顛茂士大將軍
蠻雕飛諸將既過而後普王之乘輿至矣以首相俾思
麥軍師毛奇兵部大臣欒爲之參前以王子郡王及諸
王子爲之護後乘輿至時見者皆呼萬歲最後殿者則
軍士四萬五千人各兵進若鴈行行如魚貫步伐整齊
容止威武其肅毅猛鷲幾莫能出其右諸軍既過而後
普王扶烈達力威林第三之畫像至焉像外幕以錦繡
旣入京其幕始撤撤幕時升礮百一響以爲慶兩旁觀
者遐邇畢集舉嘖嘖歎羨咸謂豐功駿烈越後超前古
今未有此盛也日耳曼列邦之兵嗣後亦均陸續凱旋
軍容之盛無不荼火爭鮮矛戟朗耀幾令人不可逼視
計在七月十七日巴華厘亞兵奏凱回慕尼克京從征

軍士正兵六萬九千礮一百九十二尊馬一萬八百匹

餘勇二萬五千人餘馬二千四百匹別有蘭華兵二萬

二千蘭華兵蓋即壯丁也統計兵十一萬六千人馬一萬三千二百

匹七月十九日薩慎尼兵奏凱回德勒斯達京從征軍

士正兵爲第十二軍餘兵爲第四軍七月二十八日戈

添畢兵奏凱回斯得都牙京從征軍士正兵二萬二千

礮五十四尊馬六千二百匹餘勇六千五百人蘭華兵

六千人統計兵三萬四千五百人時國中民人來觀者

擁蔽街衢肩摩踵接日耳曼南北各邦無不同聲相慶

行大酺禮普王特升授薩慎尼邦王子爲統領水陸兵

馬大經略蓋以獎前功也俄主聞其能兵亦馳授薩慎

尼邦王子爲元戎之職蓋以深相結歡於普也巴華厘

亞王。英年妙才。爲日耳曼諸王中所傑出。後宮德配。尙未有人。巴國求婚於俄。俄主特遣公主。往嫁巴王。公主德容兼備。淑慎有儀。自是普俄交歡。益復輯睦無間。法國參亞既居總統。位在百執事上。而心中常爲忽忽不樂。仍謀立王以統一國家。臣民中亦有知其心。而疑之者。參亞諭之曰。我今爲衆擁戴。職統群寮。位無有尊於此者矣。我何樂而不爲哉。設使迎立一王。退居臣服。則極其量之所至。亦不過一首相耳。彼此相絜。何者足貴。而謂我爲之乎。時前法王向日將帥。皆已旋法。仍長戎行。統握師旅。大帥麥馬韓巴彥堅拉白。議欲立王治國。一時同會集議者。四十餘人。皆麾下部曲也。然雖有是謀。而未敢遽發。懼衆故也。說者謂。以是觀之。不必十年。

法必仍有王矣。蓋按上天下澤之義。莫如立王而維民。爲邦本之言。則莫如君民共主。法他日者。或將如英意諸國乎。按法國之得以立君繼統者。雖憑公舉。然此際廷臣心中。各隱有所願。思得奉爲主。或有傾心於亞美路公爵者。而終不果行。因是民間亦籌論紛然。有議推奉伯爵三褒爲王者。以資治理。而事權得以統一。三褒者。係前朝之苗裔。卽前王路易非立之子也。自拿破崙第一被流之後。國中無君。國人乃立故王之裔路易爲王。十年卒。其弟查理嗣。在位六載。國人廢之。立路易非立爲王。臨御十有四載。國人又廢之。道光二十八年。爲國人所逐。遁於英國。不數年而薨。於是前朝之統系絕矣。國人復立拿破崙之姪路易拿破崙爲首統領。卽廢王也。於是拿破崙

朝復興。王旋卽真稱帝號。前後在位二十四年。兵敗見廢。國人以爲拿破崙自此中斷。而重有思舊之心。冀以興復前朝。法京中紳士人民。公行推舉者甚衆。惟爹亞持以爲不可。謂法自爲民主之國。時尙未久。此出於通國民心之所悅。乃布告方新。而更易已隨其後。如國民之震動何。且列國之人。亦必聞而笑之矣。於是其議以寢。或又謂拿破崙一朝未可遽廢者。宜擇其支族中賢而有德者。以承大統。蓋以拿破崙第一戰勝之武功。在法國也。然其說卒亦不行。旋有天主教中傳道之士。皆以拿破崙第三在位之時。並無失德。所行惠澤。浹於人心。固未可忘也。著書數千言。以述其功用。宣講於國中。冀聳衆心。迎其復辟。復有往說法故王子路易。前往嗣

位者。法故王子固辭勿往。按教士之所以稱頌法廢王不置者。以其前時厚待教士。爲衛道之干城也。爹亞意在收拾人心。前朝諸王子之謫徙散走於他國者。皆召之回國。歸其田邑。使復其舊。於是法國廷臣中間有屬意於諸王子者。然位之不定。亂之機也。爭之端也。今得爹亞爲之治理。國中臣民。要當悉心服從。俛事權有所指歸。政令無至紛出。則措施較爲易耳。雖其後君主。民主。君民共主。要必歸於一定。而際此危疑震撼之間。斷不可輕爲更置。不然諸王子聳於內。衆散兵鬪於外。不幾國不可以爲國乎。故法國此日之所急者。不在於謀置君位。光復舊朝。而在衆力贊襄。勵精圖治。其所當首務者。撫恤創痍。招集流散。肅軍政。嚴邊防。厲兵秣馬。修

普法戰紀卷十一
陳固列務財訓農。通商惠工。與民更始。相見以天。而又必鋤其虛憍。務乎愷惻。與鄰國往來。悉將之以忠信誠慤。然後道義固於干城。禮讓強於甲冑。中興之烈。庶幾可觀。雖以普之堅甲利兵。無難一戰而克之也。而此時則未也。度支浩繁。帑餉匱竭。內而國債盈千累萬。幾於國不可爲國。外而戍兵壓於境上。幾於一舉動皆難。故法在今日。必以佛狼四千五百兆。昇普而後可以從容言治也。法京亂後。民不聊生。其無工可傭。無食可覓者。約有二十四萬。皆待於上之撫恤周濟。蓋兵燹之後。必有凶年。良以事干戈。而荒耒耜。其勢必至於此。况外患內亂。相繼迭起。國帑既虛。民財又竭。死亡遍野。流離滿目。苟不善爲之所。將必流而生患。此善後之所以爲難。

也。六月二十日。法國大開國會。廷臣咸集。統領爹亞躬蒞議政院。言於衆曰。我國自與普構兵以來。前後所用軍需。約計佛狼三千兆。其費已屬不支。而大難初夷。復遭內亂。焚燒宮闕。毀棄屋廬。衙署學校。無不殘破。他日重興建造。其項又不知凡幾。一千八百七十年。及七十年。此兩年間。國家度支不貲。其入不敷出者。約計佛狼一千六百三十一兆。已於法國銀肆。籌撥一千三百三十兆。尙缺三百有一兆。平亂所需。計費餉銀佛狼四百三十六兆。合之凡缺佛狼七百三十七兆。須謀彌補。今雖大勢困窮。倍形支絀。要必設法支持。不至一蹶而不可復振。况普國酬餉銀佛狼四千五百兆。玆須陸續繳償。三載之中。若何措置。勞民傷財。莫此爲甚。每思及

之殊自慨喟。此誠國家拮据之秋。民命艱難之會。諸子當思有以上扶國運。下厚民生。世亂才出。不禁拭目以俟之焉。法國兵士被俘於普者。不下四十餘萬。議和之後。前後陸續釋還。其留而未遣者。尙有十八萬。六月中。按隊撥歸。以三千五百人爲一隊。法國大振軍威。勤加操練。六月二十二日。大閱兵於法京外。麥馬韓爲大帥。指麾衆士。教演陳法。於時環列而拱峙者。計雄師十萬。無不糾猛如熊羆。英鷲若虎豹。步伐整齊。隊伍嚴肅。軍容之盛。眞如茶火。統領爹亞亦命駕往觀。特建一將臺。臨高視下。軍中齊聲稱賀。法之國威。冀自此漸可振作矣。前法將褒巴奇。與普將瓦特之戰於魯亞河上也。法軍敗績。普軍奮力窮追。法軍勢迫情沮。不得已退入瑞

士國境內。盡委其鎗械。始得脫於險。所棄軍裝。皆爲瑞士官員所取。儲之武庫。後法人償以佛狼二百萬枚。解至瑞士國。蓋以稍酬其值也。瑞士隨將所得器械甲仗。盡行交回云。統領爹亞爲一國之人心所歸。幾仰之如慈父嚴君。一切措施。俱臻允當。所有善後事宜。無不次第舉行。歐洲諸國。言及爹亞者。咸嘖嘖贊美。敬服之弗遑信任。其言有過於前日全盛時。在位之法王。爹亞於英京銀肆。貸國債佛狼一千兆。以償普國軍餉。蓋同一納息也。不如假諸鄰邦。則普戍守之兵。可以早撤耳。法人意在興利除弊。整頓一新。招募工匠六千人。開通河渠。修造宮闕。於其毀者新之。於其焚者建之。初擬大興土木。凡城中所有殿宇。廨署。屋廬。館舍。將圖盡行重作。

恢復舊規。繼以興作之資。無所出故。僅擇尤要者治之。八月二十三日。法京國會人員。咸集議事。欲令爹亞權攝朝政。俾得久於其位。蓋統領之任。不過四年而期滿。短者僅一二年。議院爵紳。特揀大員十有五人。以論斯舉。然後謀於兆衆。俾其常握政權。然十五人中。從之者僅五人。不從者九人。依西國舍寡從衆之例。其議以寢繼爲撤除護勇事。爹亞與國會人員。意見不符。卽欲辭位而去。於是國中勸留者紛至。廷臣因爲調停其間。彼此相安如初。顧諸部大臣皆解職歸里。在位者惟爹亞一人而已。因遴選新員。以資治理。竊謂法國在今日。大難初夷。人心未定。正宜舉一老成持重者。爲之從容。靜鎮其間。不宜屢有更張。致滋釁變。爹亞才當其任。一切

設施。廷臣必當虛己而聽。俾國民得以久資倚畀。逮庶務粗定。紀綱已肅。而後再議其他。又常論之。發孚之才。識亦法國諸大臣中。所僅見者也。徒以一言不合。遂至解組以去。雖爹亞慰留至再。亦不能挽回。蓋難進易退。矯矯有相臣之度矣。初天主教士。群請於爹亞前。欲法國以兵迎羅馬教王。朴復還故都。爹亞以國事艱難。未遑他顧。爲辭。但致書教王。請其駐蹕法國。爲寓君無至播越在外。且謂前時在位之法王。屢欲強羅馬。弱以大利。已嘗陳說利害。從容勸諫。而王卒不悟。不知以大利強。正足爲日耳曼患。而爲法國多一屏蔽。今法當喪敗之餘。將與以大利輯和之。不暇。豈容輕啓釁端。再樹一敵。教士所請。眞未能度勢審時。而爲法國計者也。諸教

士聞之。以爲卽納教王於舊京。亦當不至與以大利。甲兵從事。由是其請益堅。爹亞遂命發孚。與諸教士籌商。裁奪發孚。雅不欲預於是役。遂以景逼桑榆。乞骨骸歸田里。其去也。國人多惜之。蓋以發孚宣勞王事。盡智竭忠。普法釁作。爲國忘身。馳驅况瘁。茲幸國難已靖。而以年邁七秩。引疾以歸。怡養山林。優游泉石。以自適其物。外之天。嗚呼。所謂成功而退者。非耶。發孚亦可謂賢矣。發孚既去位。法人乃立李苗實。爲總理外部大臣。李生於一千七百九十四年。蓋年七十有四矣。亦深沉歷練之士也。法自和強鄰。平亂黨後。其行政之最大者。莫如裁兵額。節糜費。汰冗員。俾國帑有贏。餉糈無缺。庶可爲持久計。否則善後條例。事事取之於民間。雖一時黽勉。

踴躍樂於捐輸。事集而效速。然由目前而觀。則易而自日後。以計則難。何則。國債既重。則必謀所以償。於是加稅增餉。重權苛征。商民之怨。卽由此起。使徒粉飾彌縫。而不力求上理。則譬如加堊於將圯之牆。自爲安堵。而不知傾覆之隨其後也。但圖外飾之華。而不思內治之善。何以異此。舊議徹裁兵勇。原將以節財用也。顧或者謂水師可減。陸兵斷不可裁。乃議國中駐守防兵。定爲三十六萬。餘勇壯丁。共計定爲九十萬。此與前時常額。不甚相懸。未嘗少損。夫法國此時舉動。關繫匪輕。而權其急務。要當以甦民困爲先。必十年生聚。十年教訓。而後可用也。是在上之人。卑宮室。惡衣服。菲飲食。躬以儉德。率其下。昔衛文公。大布之衣。大帛之冠。以治其民。而

國以驟強。雖爲狄亡而不害。越句踐臥薪嘗膽而卒復仇。沼吳夫亦以節財克己爲先耳。今法國志在耀武。如此其必銜普國之仇。無一日而不思報也。夫有報人之志。而使人知之。此子貢之所以危越也。昔者普之伐法。不動聲色。而事已猝成。而法之攻普。徒費言詞。而備無一集。前車之覆。後事之師也。法奈何重蹈往轍耶。說者謂由是觀之。干戈之事。雖暫息於目前。而鋒鏑之虞。恐興於日後。法國邊境兩省。所倚爲天塹者。卒爲普所割。此法之所不甘也。然法欲治國興邦。固未可一日忘敗。特可有是心。未可卽有是舉也。法其善自爲謀哉。

普法戰紀卷十二

校合山田榮造

普法戰紀卷十三

南海 長宗良 芝軒 口譯

吳郡 王 韜 紫詮 輯撰

法自與普議和罷兵。在廷諸臣皆給假休沐。凡兩閱月。蓋以諸臣歷籌艱鉅。勞瘁實多故。使之暫歸田里。以資息養。法國被俘兵士留於普境者。尙有十八萬。約成。盡行釋遣。陸續回國。當局者不獨妥爲安插。使無至於變。而於補給軍餉一節。亦且大費躊躇。蓋其被擄至普。已歷數月。至此按數補給。恐一時國帑度支。必至不敷也。普法構釁時。法之官員軍士。戮力疆場。驅馳王事者。死傷如積。已難更僕數。然猶未止於此也。和議甫成。內亂

旋起於時勤王之兵四集。率師環圍法京。大小數十戰。官兵之喪者。約略千餘人。男兒當馬革裹尸。乃馬伏波之壯語耳。然死亡如此。亦足傷已。法國所酬普餉。續交之期已至。其銀錢悉盛以布囊。計製囊之值。亦不下佛狼五萬枚。運費所需。在法境則法爲措理。法境以外。無與於法。惟兩相授受之日。其數太繁。難於逐枚考核。因置之箱。以權輕重。而省檢閱。續項擬用金條。庶免需時。亦以節事。普國戍兵之在法者。於九月中。已撤四郡。其留者。尙餘十有五萬。八月下旬。法京巴黎斯。大集議事。其時至者如雲。冠裳畢集。公舉爹亞爲大統領。以三年爲期。衆論僉同。無有異說。蓋法國臣民之傾心於爹亞者久矣。自此權歸於上。政出一人。爹亞可以黜陟賢否。

主張和戰。頒設條例。接納鄰邦。法國政事。可以整頓。畫一矣。法人已舉爹亞爲總統。閭閻無不額手以望治。然有難處之事三。爲爹亞旦夕所危慮。而經營者。一曰。籌餉以濟軍需。償鄰項。法酬普餉。其數甚鉅。固非倉猝所能驟辦。然而限期甚近。轉瞬卽屆。先事綢繆。宜預儲待。國中所有新舊兩軍。不下一百餘萬。月給糈糧。亦極繁重。二者。謀所以濟其急。惟有告貸於國債。顧貸債必須納息。國家度支日匱。必至不給。則惟有增稅益賦而已。顧此必重困夫民。而民易生怨。民怨則國本易漓。使非有善法。以支持其間。此其憂將不止在日後也。二曰。設法以安插新軍。法兵之屯駐於禮吳河者。向爲巴彥麥馬韓所統轄。是爲舊軍。其數四十萬。其招集於來華河。

者乃由師丹敗後始行召募。是爲新軍。營中帶兵員弁。向多未歷戎行。或讀律之士。或持籌之商。以軍務孔亟。遂任統率。授職賜銜。以備折衝。和議旣成。新舊兩軍。彼此相妒。而不相下。其新軍以爲。雖從事於倉卒。而爲國宣勞。不辭艱險。則一也。國家允宜視同一體。頒精優資。待之無區畛域。法國廷臣。當卽爲設法調停。無釀意外之虞。三日立君行政。以期久遠。爹亞茲爲總統。任孔大而責綦重。鞠躬盡瘁。夜以繼日。其於軍國重事。或獨斷寸衷。或互資衆議。每日視事。必歷九時許始息。所謂憂勞王室。杙隄於懷者。殆有過焉。夏秋之間。天氣炎熇。倍於往歲。一遇凶荒。國事益不可問。所求於撥亂反正之才。致其國於中興也。此皆爹亞焦心苦慮。而不能稍釋。

者也。法廷人員集議於國會。謂法國迭遭外患內亂。雖東境諸郡縣。幸未罹於兵燹。而其已遭蹂躪者。不知凡幾。宜集衆捐貲。設法補拯。惟時各郡輸將之項。已至佛狼六百六十兆。法京亦集至二百兆。於是議行補恤之法者。紛如聚訟。總統爹亞謂。地方雖遭擾亂。但其間仍有家業豐裕。無庸補助。若欲惠澤之周。雖千兆猶不足耳。今當國事孔亟之秋。帑藏支絀。此非至計。其或閭閻有流離失所者。則加撫字可也。座中有謂。經費不敷。則當設法勸捐。凡在法國字下。無論土著羈旅。苟歲有佛狼一千五百枚。必當什一徵抽。過此則倍抽。爹亞曰。抽欸如是之重。無論非人心所欲。卽補恤者。亦必按其所喪物產多寡。以爲差等。而其所報。或有不實。均費察核。

總不若有失所者。則撫恤之爲簡而當也。後議區三等。爲補苴首。爲家業全喪者。次爲受創過半者。三爲雖經患難。仍可自活者。首等按其所報核實補置。次等稍給以賞。用示體恤。三等俟國家充裕之後。然後償。立法亦頗持平。法國償餉於瑞士。以佛狼五百萬枚。先是法將褒巴奇所統之兵。因敗於普。誤遁入瑞士國境。由是賞糧屏屨。皆瑞士爲之供給。法國前已饋銀於瑞士。招集軍士。收拾器械以歸。茲再饋以五百萬者。償養兵之費也。蔑士爲天設之險塹。自歸於普。爲普兵戍守。城中禮拜堂一所。朗敞崇閎。鐘樓尤爲高聳。絕頂懸法國旗幟。一臨風飄展。自遠畢見。日耳曼人思下之。而無由。蓋是樓幾孤峙雲表。頂甚尖銳。殊難施力。後延法人設法下

之。而法人無首肯者。或疑是樓縱使凌霄干日。而依樓架木。使工匠猱升其上。攀而下之。猶如探囊取物。又何必藉力於法人哉。法於軍事孔亟之時。在來昂城。招募勇丁。赴省雲集。約成亂弭。各行遣歸田里。日耳曼戍兵。尙在法京外。所有法京外礮臺。均已交還。仍由法兵鎮守。法國內亂。既戢亂黨之就擒者。以千萬計。當事者。每日開堂訊鞫。以成信讞。自始至今。案牘累累。經數十日。猶未能徧。甚矣亂黨之繁也。其得脫免者。皆遠颺別國。或有遁於英境者。據西國例。除海洋案犯及搶劫盜賊。可以移文別國索取。若亂黨則不在此例。故雖轉徙他國。反得逍遙局外云。戰事既畢。歐洲諸國士女。多往法國玩遊。幾於肩轂相摩。踵趾交錯。至曾經兵燹處。燕麥

兔葵蒼涼滿目。鹿場麋町。荒廢愴心。此固法國無限盛衰之所係。而觀者亦不勝今昔之感焉。有往訪普軍之遺壘。而嘆普軍師毛奇。真爲天下奇才。有觀戰場遺跡。而羨普國君臣之神機妙算。爲不可及。三軍之勇。世所罕覩。其遊師丹城者。則最喜入普相與法王並坐。議降之小屋中。嗚呼。師丹亦法之重鎮也。一經挫敗。幾至喪亡。然爾日之戰。亦未嘗不勢撼山川。聲滿天地。觀者愛玩。議降之屋。其亦抒懷舊之蓄念。發思古之幽情。而感法之一蹶不振。將以法爲鑒耶。蔑士法之雄鎮也。法之捍衛邊圉。整頓武備。扼守險隘。以此爲中堅。法之有此。船車之有軌。舟之有舵。其繫於安危。關乎衝要。可知。自爾日耳曼。爲其屬地。嗣是而後。普可以擊法。而法不

可以擊普。蓋法無蔑士。則普軍一出。即可直抵法都。是法之失蔑士。卽如喪其左右手。有擊之者。幾於無所屏蔽。然京師乃根本重地。不可不謀。所以保固。縱失其上。亦當降求其次。故議於褒治地方。建築礮臺。增修堡壘。以資控禦。又於城中。創造礮局。藉製器械。其地雖不及蔑士之險。然亦法國不容已之舉焉。法酬普餉。定議佛狼五千兆枚。核期三載。盡償。初盟成。立約時。以所割兩郡境中輪車鐵路。準抵佛狼三百二十五兆。再交一百七十五兆。爲五百兆。先後又續交一千兆。普兵之屯戍於法境者十萬。日需餉費佛狼三十萬。皆由法國爲之供給。待第四期再交佛狼五百兆。爲盈二千兆。則始循約撤兵。惟留五萬小駐法境。以待所償餘餉。普軍駐法。

供億浩繁。法將不堪早償。一日所省亦已多矣。曩者法王在位時。謀國之最善者。若莫如親英。無事則共享昇平。有事則共相聯絡。數十年來。英法並軌連鑣。稱雄海外。率以此法。故能助弱土。服強俄。國勢駸駸日上。蓋英法固唇齒也。合則力銳。分則勢孤。普法之役。英一不預。而法遂蹶矣。此其明驗也。其失則在袒護教王。取怨鄰國。雖其爲一身計者。未嘗不得教民之心。共相推奉。卒以失與國之助。一敗不振。至於喪位去國。由識者觀之。則行教者之無益人國。可知矣。法王既廢。猶自以爲法國主。蓋以法王之躋尊位。由於群情所仰戴。今所立者。僅從國會人員之私意耳。嗚呼。江山猶是。富貴已空。轉轂繁華。眞同夢寐。法王於此。夫亦可憬然悟矣。普國毛

奇善於用兵。其治軍也。內愛而外威。故接刃交鋒。士卒皆樂爲之用。出師之日。兵士輒相聚而言曰。將軍惠施於我。亦厚矣哉。我等所以報之者。惟有有死之榮。無生之辱而已。以是所向克捷。伐法之役。聲施爛焉。凱旋後。普王賙以麥刺士一百萬枚。麥刺士一枚。可抵應銀四分之二。以旌其功。毛奇辭讓再三。卒不敢受。謂鄰封啓釁。我國宣威。強敵克摧。受盟城下。割地酬餉。震爍千古。然而膚功之克。奏實。在將帥和衷。士卒用命。故能所向克捷。兵無勁旅。地無堅城。臣何力之有焉。敢膺隆貺。按克法之役。凡運籌決勝者。多出自毛君一人。然功成而不居。賞懋而弗受。易曰。勞而不伐。有功而不德。毛奇有焉。豈在古名將下哉。軍師毛奇。將軍瓦特。並普國名臣也。或運籌制勝。或殺

敵致果。奇功偉績。照耀人間耳目。毛奇生於巴潛。瓦特生於扶禮北。普人因於二君所生之地。各肖其像。立於通衢。以資後人景仰。夫二君並一代偉人。爲時名將。乘時崛起。與國家建樹勳猷。肖像旌功。誠一時之嘉話。足爲閭里光。况其地挺生此人。固當有以昭其不忘。所謂人以地傳。地因人重者矣。有日耳曼商人。旅居於俄之墨士科京城。聞普相俾思麥。功勳赫奕。無不嘖嘖歎美。乃集衆輸貲。得佛狼四千枚。購白馬三匹。馳饋俾君。以資乘騎。三馬並神俊不凡云。日耳曼人多珍嘉。品優學博。向爲天主教中牧師。生平著作甚富。皆足以發明教中至道。造其堂奧。人仰之若泰山北斗。乃公舉爲巴華厘亞國子監大學掌教。甚洽輿評。俄國於近十年來。訓

軍閱武。備邊置械。殆無虛日。自普勝法後。其備益嚴。礮局鑄造。鎗礮。船局裝製。船艦。爐火燭空。工作推鑿之聲。不絕於耳。又遣人四出。馳赴遠方。採辦物料。一切軍裝。無不預儲以待。軍令朝頒。師可夕發。普自勝法旋師。益爲自衛計。精糧器械。蓄積如山。軍士俱皆列營整隊。卽倉卒之間。亦可調遣兩國之兵。皆有如矢在弦。引滿待發之勢。或疑爲兩大相殘。或疑爲兩大合力。以併諸弱。小說者謂兩虎相爭。必傷其一。是非兩大國之利。乃諸弱小之福也。今時俄普兩國君臣。異常輯睦。相殘之兆。何自而萌。蓋兩國之備兵待用者。或自有說。特未測其雄心之所向耳。一千八百七十一年八月十七日。普壤兩國之王。會於嘉士田。普以首揆俾思麥爲相。壤以首

揆標土地爲相。普相以其幕賓羅得布查隨行。論者謂是會也。必有軍國重事。欲得俾君酌商。參贊其間。否則普相斷不離華善耳。華善者普相別業之所在也。其地古木千章。參天匝地。幽澗飛泉。群峯滴翠。旁構一墅。依林傍水。風景清幽。其間重樓疊閣。曲室迴欄。異獸珍禽。嘉花美木。殊足以娛目騁懷。普相公餘之暇。恒以此爲休沐之所。非有大事。車騎不輕出也。歐洲列國日報。猜度普奧兩君相會之故。乃因魯捫尼亞事。未可知也。魯捫尼亞。爲土耳其屬國。前以建築輪車鐵路。與普貸金錢一千萬枚。其貸主多北日耳曼人。久之未償。普相因請之於土耳其王。土王曰。援一千八百五十六年所立之約。我無權焉。彼國之事。未敢聞命。今之普奧兩王。相

會於嘉士田者。殆欲與之合兵致討也。魯捫尼亞。雖蕞爾彈丸。而立約保衛者。有數大國。俄普奧英法意。皆列名約中。魯境北枕俄疆。與俄尤有唇齒之義。俄斷不容普之鯨吞蠶食也。普兵若動。俄必保境相拒。法亦必潛師襲擊。非計之得也。故普相熟思審顧。欲得奧以爲左右手。普奧合而俄奧非其敵。蓋以奧制法。而普即可專力於俄。法軍勁旅四十五萬。而奧之驍騎七十三萬。有奇。其精警。迥異於法。奧爲普助。法固不能議普之後矣。俄國土地雖廣。人民雖衆。甲兵雖多。而人才則遠遜於普。兵力亦不及其精。人心亦不及其一。俄北境有所屬三郡。皆日耳曼人所寄居。普與俄成釁。則此三郡之民。必群起響應。願爲內附。觀於向者請於普王用兵襲取。

則人心之向背可知。嘉士田之會。普相謂。奧相曰。魯貸不償。則約亦當改。奧相行文諸國云。嘉士田之會。並未結約。惟哈士北已有盟言。謂東土之事。一有變故。則普奧卽當併力相圖。其言雖未了然。然觀其梗概。亦可見普之疏俄而親奧矣。顧普於戰法之日。嘗與俄親。何爲今昔頓異。詎知昔之親之者。畏俄之乘間襲之也。今已講和凱旋。普終當有事於俄。而或患法之接踵發難。則惟奧可以已之。因又以親俄者親奧。奧固畏普者也。驟得其親。必喜而爲其所用。奧爲普用。則普可無法之後慮。而得以備俄。是親俄與親奧。雖有異。而所以親之之故。則不異也。一以親之。而弭其攻我。一以親之。而收其助我。皆籌國之深謀遠慮也。然而俄亦早知之矣。俄官

近嘗與法官言。俄今日之忌普。與法昔日之忌普。無少異。俄京郵報云。今日普相俾思麥待俄之法。猶日待奧待法之故智也。初普奧兩國相會。旁觀者以爲無機密事。惟因普相之行。則知其中當別有故。蓋普相之一舉一動。爲各國屬目。注意者如此。特普相之才。大如海。心細於髮。歐洲諸國。無不震而矜之。而其幕賓羅得布查。奇才瑰偉。則人鮮有知之者。羅君之才。固不可以道里計。惟以不居當局。故名猶未顯耳。羅君之善謀能斷。有發必中。俾君體國經野。集思廣益。帷幄之助。羅君首屈一指焉。擬諸戰國時。孟嘗之馮驩。平原之毛遂。曾不足步武其後塵。蓋馮遂未離說士習氣。若羅君則經綸素裕。故能上佐俾君。贊黃扉。長樞密。若網在綱。有條而不

素焉。故曰。爲國者不可不得人。爲相者亦不可不得人。普之強。普相之功也。而普相之功。幕下與有力焉。普與兩君既會於嘉士田。越日復會於沙士北。隨行儀從。一如在嘉士田會時。兩首揆爲左右相禮。會時兩國君臣。籌議逾時。鴻謨駿略。有非尋常所得聞。議畢。乃大張盛筵。相與合歡。觥籌交錯。水陸紛陳。可稱一時嘉會。已日耳曼郵報云。普與兩君復會於沙士北。蓋爲聯盟計也。普與兩君自此結約締好。患難相援。憂樂與共。所聯之盟。乃爲力保歐洲昇平之局。凡有逞干戈。樂戰鬪。俾歐洲不得享昇平之福者。則兩國當合兵擊之。是盟也。意大利國亦預其列。論者謂。普與意三國聯盟。皆普相俾思麥之老謀深算也。曩者意大利乘法國戍兵甫撤。卽

圍羅馬。逐教王。建以爲新都。教王向爲法國所翼護。意大利驅之。無異與法國爲讐。茲當喪敗之餘。力不能與。意大利從事。雖暫忍須臾。未嘗不陰圖報復。一俟撫恤凋殘。蓄養精銳。其舉兵聲討。不卜可知。斯意也。匪獨法國蓄之。意大利亦自知之。知之而爲之備。則惟有合普以拒法。當今歐洲最強者。惟普與俄。普嘗挫法。尤爲意大利之所悅服。俾思麥籌思及此。故不費招徠。而意大利卽樂爲歸附。是蓋藉意以禦法也。與嘗爲普挫於薩都華。宜乎重銜舊憾。難締新歡。然與固籌之。已審也。曩者一戰而屈。地喪師燬。度勢權時。已不復有報普之望。且普俄法三國之強。與皆忌之。而湖厥宗支。則普與固聯邦也。木本水源。原同一體。當此兩雄角立之際。與甯

不欲附普而相親。此又俛思麥意料及之。而躊躇滿志者也。知奧之可爲我助。而遂思有以用之。則俄乃不敢圖普。故普奧親則足以制俄。普意合亦足以禦法。吁。普自勝法之後。其強已不可制。而又益之以奧。意夾爲輔翼。此其盛隆豈可以意計測哉。數歐洲之雄。普其推爲領袖。而普相亦可藉此兩國之助。大展其所欲爲矣。日耳曼特開議院。大集廷僚。共抒衆論。其所頌大開議院。詔書謂。今日者普與俄奧兩國相親。共圖輯睦。歐洲可永保昇平。群臣皆以手加額相慶。訓練軍士之法。當以日耳曼爲最。每歲大閱一次。或十餘日。或二十餘日不等。其所操演。不獨程其坐作進退之方。策其步伐止齊之用。而運籌調度。悉寓其中。操法分主客兩軍。皆具中

堅左右翼。騎卒徒兵。無一不備。旗幟紛纒。鎗礮精利。鼓聲旣震。則作兩軍對壘狀。惟鎗礮俱不用彈。懼傷殞也。演時或作主軍攻客。或作客軍攻主。將帥指揮。士卒效命。兩軍旣合。勝負遂分。負者奔。勝者逐。乃計所俘之多寡。所追之遠近。爲優劣。其操縱合闢。不殊於臨陳破敵所異者。惟斬馘耳。如是不徒飾美觀。誠可徵實用。蓋無事而習之。臨時而行之。自可制勝於疆場。奮勇於戎行。藉收厥效。在奧地利國。則自一千八百六十年。已仿行此法。英國亦深慕此制。特遣統兵大員大亞得室。大閱軍士。以兵四萬。分爲兩軍。旌旆飛揚。軍容荼火。武備爲之一振。竊謂殺敵致果。雖不可以無事嘗試。然徒耀外觀。則縱劍樹刀林。雷轟電掣。祇足令閱者娛目而震耳。

而於帷幄之運籌。疆原之決勝。無當也。必如是庶足徵將帥之抱負。士卒之精強耳。普自勝法之後。國勢孔張。聲靈廣播。實為空前而絕後。諸國無不樂為趨承。普俄比肩兩大也。普王勝法凱旋。俄王乘輿親抵其國慶賀。而多錫武功品級。與普有功諸臣。俄有三省地與普接壤。總制三省大員。時與為難。俄王俱調往別地。而以與普素所親厚者。調補是任。魯捫尼亞土耳其屬國邦所負普之債。英則勸其速償。壞地里意大利皆喜與普親附。然則普之為國。其興勃然。薄海內外莫不欽崇。尤為近日歐洲諸國所不及也。法國自削平亂黨之後。即以華西路為新都。因法京屢遭蹂躪。頽垣敗壁。觸目荒涼。廢黍殘梧。傷心景物。華西路地當衝要。可為京師屏衛。故暫行

移都於此。凡籌軍國重事者。率於此會議云。法國之羅連郡亞魯西士郡。已割隸日耳曼。歸其統轄。普相俾思麥。既得其地。遂思所以繁旺之。因與法國廷臣商謂。日耳曼貨物。由羅亞兩郡出口往法國者。如減輕稅餉。則日耳曼戍兵。當退離法國六郡之地。其留屯法境。以待償餉之兵。亦僅留五萬以相報。法國固急欲日兵之撤。幾若不可終日。國會人員。集眾酌議。意將許之。特以總理外部大臣李苗實。使往意大利國。議闢山路。因待其歸。然後定約。按日兵留屯法國。最久亦不過三年。是日所許法者暫。而法所許日者久也。普相逆知法之急欲退兵。必行其說。故藉以嘗試。然此議卒不果行。因已許之於日耳曼。則不能不許之於他國。此固萬國公法之

普法戰爭紀卷十三
備道館
大旨也。公法凡有利益之舉。既許行於一國。則他國亦可援例以相請。法如不許。則不符於公法。盡許則法將不堪。故此未能遽行也。運會盛衰。古今恒有。而不圖方。言一端。亦隨盛衰而別。亦可異矣。歐洲之有法國語言。猶華人之操中州音也。歐洲各國。文檄往來。使臣交際。多通用其方言文字。我國方言總館。向以法國言語爲上。今俄王特頒詔國中。嗣後群尙日耳曼言語。而法語因此廢矣。炎涼之感。殊令人不無嘆息耳。法尖昵華郡。於一千八百七十一年十一月間。猝罹火患。一時延燒頗遠。廬舍衙署。盡付祝融一炬。重樓煥日。傑閣連雲。畫棟雕梁。盡飛揚於虐燄中。頃刻間。頓成瓦礫場。未毀於兵。終燬於火。浩劫之餘。邁茲烈燄。亦爲意料所不及也。

一將功成。三軍暴骨。此雖爲好戰者說法。然亦舉實言之也。普法之戰。雖普勝而法敗。而普之死傷亦復不少。計南北各邦。統兵官之死於王事者。一千一百八十五人。其傷於戰陳者。三千七百九十四人。潰散奔竄。至無踪跡者。三十人。共計四千九百九十人。南北各邦。兵之死者。一萬八千一百三十一人。傷者八萬七千七百四十二人。潰散逃失者。六千一百六十五人。共十一萬二千三十八人。以上皆據營官所錄實數。英法通商和約已際更易之期。因法國欲加徵花稅。暫停以俟再議。法國災黎流離失所者。不可勝數。英國諸善士。以惻隱爲心。不分畛域。集衆捐貲。大施賑恤。寒者衣之。飢者食之。疾病者給以藥餌。無力耕耘者。畀以牛種。善舉遞行。災

黎得以無恐。於是路無凍餒。野有工作。漸稱得所。計各會所捐。已不下佛狼一千一百九十八萬三千枚。嗟乎以英人觀之。其恤鄰周急之義。固有可風矣。法國統兵人員。曾被俘於普國者。再不得臨陳抗敵。此立約時所矢誓詞如此。惟一蒙釋遣。仍履行伍。與普爲難。事既平。普相俾思麥。軍師毛奇。請於法國朝廷。謂當治其背盟爽信之罪。特設立兩國人員。秉公明訊。以成定讞。按西國例。臨陳被俘。及獻城納款者。均當矢誓。謂於此次戰務斷不再爲攻擊。於是敵國以誠信相待。釋之一任其所適。乃法國統兵官。竟有朝獲釋。而夕從事者。普相故有是請也。然竊論之。法官違誓。固屬不信。法國烏用是不信之人。固當明鞫定罪。藉以敦信。然彼之所以失信

者。非爲私計也。身甫脫於陷穽之中。卽復提戈相向。此際國事爲重。私事爲輕。所屈者徒失信於一時。國事冀因之有濟。則屈於己。而伸於國矣。是其所由失信者。實緣忠憤所激。而爲之也。當此際。惟忠與信不獲兩存。法官則取忠而舍信。是法國多一失信之官。而實多一矢忠之臣也。法國又安能不用此棄信崇忠之士。或謂戰敗見俘。矢誓不背。此西國之通例也。今法官違誓取戾。匪獨不得爲法國之有信人。并不得爲西國之有信人。普相所請。亦爲西國大體起見。法國要當顧大體以鞫之耳。嗚呼。孔子所云。言必信。行必果。硜硜然小人哉。其斯之謂歟。法國雖經挫敗。但有爹亞。以爲總統。而軍國重事。又有麥馬韓。褒巴奇諸大臣。相與翌贊其間。其有

爲仍未可量也。一千八百七十一年十月十九日。日耳曼新闢議院。廷臣戴卜獨持卓見。謂普國大勝之後。仍當嚴備。近觀法國舉動。其志蓋非須臾忘報復者。但目前力猶未及耳。我宜蒐閱士卒。捍禦邊防。以戒不虞。而立於不敗之地。以俟一千八百七十四年。當必興報我之役矣。日國戍兵。陸續撤旋。其留於境中者。待酬餉既畢。然後退。當普兵未退以前。軍中餉費。皆由法國供給。第普兵在法境時。以小故涉爭。在亞棉城時。因與法民有釁。下令凡居城中者。亥正以後。禁不得出。各家俱當鍵戶。違者有誅。附近招刺有波瀝尼鄉者。距普兵之營甚近。鄉民因事與普兵有隙。私執普兵一人。縛置輪車鐵路旁。別兵見而釋之。知爲鄉民所苦。入夜各軍士排

班嚴守。街衢間皆有巡丁邏察。宵闌忽有從暗中鳴鎗者。鉛彈飛出。普兵傷一人。斃一人。傷者不逾刻卽殞。普兵於是吹角集衆。麾隊疾進。攻入鄉中。戮斃者無數。詰朝普兵忿猶未已。誓欲蕩滅是鄉。聞於地方官。乃詣營哀祈。卽將滋事匪人。正法治罪。其事始寢。法國內地鄉間。有普兵駐營。所在居民。與之不和。口角紛爭。幾致激變。最後官長出。而彈壓始得靖息。沙斯威厘地方。有二匪人。謀殺日國戍兵。普相聞之。極爲震怒。旋又有土人。手刃日之戍兵者。被執至官。經鞫後。以其無據釋之。普相意甚不洽。謂嗣後有類此者。格殺勿論。其屯戍於法之北境者。亦時有鬪爭。一日有一普兵。爲法人所殺。行兇者。被執於巡丁。解官讞訊後。經法官當堂鞫問。知其

非係故犯。卽時釋去。普人聞之。大以爲不然。謂有罪而不加刑。是佚罰也。庇民而不伸法。是徇情也。於是普國首輔俾思麥。致書法廷。責其措理未善。不洽輿評。有法國律師。爲是案辨證者。致函於日報。以伸其說。謂法官所行。一秉大公。無所私袒。所有被控二人。一因自衛。而致斃普兵。一因素有顛疾。難自主持。按律均不得加之。以罪釋而不問。未可爲非。夫兩造具而後情乃見。公聽明而後事始知。彼普人之所以忿然激怒者。由於僅據原告一偏之說。而未悉其顛末原委耳。苟平心察之。則可了然於其故矣。奕中低手。往往有欲得之於人。而反失之於己者。軍行之道。亦猶是耳。雕哥律。法國將軍也。身經普法之戰。而嘆成敗之有所由。因作一書。曰師丹

記錄。其書尙未斷手中所記。乃追述當日麥馬韓之敗。師丹之降。且云。師丹於獻城納款時。普軍師毛奇。謂法將雲芬曰。法國倉卒興師。惟知以日耳曼地圖授之。統兵諸將。而反忘以法國地圖相授。故法國諸將。於師丹地勢。茫乎若夢。由是觀之。我今於師丹形勢。反熟於爾矣。嗟乎。主客固異勢也。乃今反客而爲主。客已了了於胸中。而主反茫茫於局內。是則主之爲主。可知。而客之爲客。亦可知矣。夫奕之爲數。必無失於己。而後可以有得於人。若法將者。其惟欲取人。而反忘守己者歟。普法兩國。各遣公使。駐筭都中。自此互相友睦。仍敦夙好。而踐前盟。法國以度支不足。擬加稅餉。絲每斤增抽佛狼九枚。至十二枚。中國絲每斤增抽佛狼十一枚。至十三

枚。棉花每百斤增抽佛狼四十枚至四十五枚。蘇每百斤增抽佛狼十六枚。術數之學。儒者弗尚。然數之所定。實有不爽者。豈冥冥中固有主之者耶。西士嘗有探心數學。由後溯前。逆驗之而不忒。由前卜後。遞驗之而相符。是可卽觀於法國者。以見一斑。法先王路易非立之卽位也。在一千八百三十年。至一千八百四十八年。而見擯於國人。按其誕生之年。則一千七百七十三年也。以一七七三之數合計之。得十八年。以十八年之數加於一千八百三十年。恰成一千八百四十八年。是卽位之年與誕生之年合計。固已兆其去位之年矣。又按其納后之年。則在一千八百九年。以一八九之數合計。亦得十八年。以此數加於卽位之年。亦恰如其去位之年。

也。然不但徵之於君者無爽。卽徵之於后。亦無不然。后生於一千七百八十二年。以一七八二之數加於一千八百三十年。又恰如其去位之年。然此但由後而溯前耳。至於由前而可卜後者。則在與普啓釁之時。前法王拿破崙第三。西士嘗決其去位。在一千八百六十九年。王於一千八百五十二年卽位。而於一千八百七十年。蒙塵。似差一歲。然所爭者不過數月間耳。究亦所差甚微也。王生於一千八百有八年。以一八八之數加之於卽位之年。卽成爲一千八百六十九年。王之納后。在一千八百五十三年。以一八五三之數合之。卽位之年。亦得一千八百六十九年。后生於一千八百二十六年。以一八二六之數合計。卽位之年。亦得一千八百六十九年。

年其數之歷歷可稽如此。孰謂術數不足憑哉。法國大
闢議院。總統麥亞命駕親蒞。手諭國會人員。略謂。茲特
變通成法。以圖至治。業已胸有成竹。行將綱舉而目張。
茲值鄰封友睦。與國修和。國政既已善爲轉移。軍紀亦
當力求振頓。今者創立兵制。額軍計八十萬。備不測之
用者九萬。當兵籍七年者四十五萬。法國於茲雖幸內
外無事。然兵不可一日無備。亦不可一日不精。凡我國
會人員。俱當留意於茲。爲國家建久長計。而奠磐石之
安。苞桑之固可也。謀人之軍。師敗則死之。此人臣之常
分也。然西國每有不得已而降敵者。或糧絕援窮。內外
俱困。與其驅餒軍以殉敵。何如權宜於一時。此則率師
者之苦衷。然必內無愧於心。外無曠其職。然後可告無

罪於軍國。否則臨難苟免。相率降敵。不可爲訓。茲者法
國將前時敗北。獻降諸統兵官。細加鞫訊。察其投誠之
由。是否有玷於官常。如其出降情形。果係出於不得已。
卽免置議。苟或自墮軍威。喪師辱國。卽從嚴譴。罰以爲
視。降如歸者。警普兵留駐法國。以待酬餉者。於一千八
百七十二年正月。裁留五萬。按普法所立和約。定於五
月撤師之半。今未及期而先裁者。以彼此皆有所益。而
預撤之也。法國第四次所酬普餉。佛狼五百兆。普亦許
其分次限交。以半月爲一期。云。前法王蒙塵之後。所有
宮中御用。盡付之五都之市。凡大小馬車。七十二乘。價
昂者每乘得佛狼三千五百八十枚。其次一千四百枚。
舊蓄名酒萬瓶。皆上方佳醞也。至是亦盡入民間矣。一

千八百七十二年正月。法國總統辭位不居。廷臣皆相率解組去職。於是年。臣民之攀留者踵至。爹亞答書許暫留視事。或謂觀於爹亞去位一事。而嘆爹亞所膺之任甚重。所處之位甚難也。法國新經喪敗。力籌善後。事需財。其大者國政軍政。皆當不然。一變。然要非財不爲功。蓋幾如壞墻破屋。無處不賴彌縫。卽無處不需財力。然計其財所從出。不外乎賦稅一途。當此國用艱難之際。勢不得增收稅餉。乃民間輒忿然曰。向未有若是之衆多也。今胡爲者。此難在理財者一也。至於所籍以衛國衛民者。兵也。然當帑項支絀之日。欲不養兵。則勢有不能。欲盡養兵。則財又不足。卽欲寓兵於民。復慮民情之搖撼。此則難於治兵者一也。尤其甚者。法王蒙塵

被廢。諸王子不無覬覦之心。卽朝臣之中。亦復分門角立。此弛而彼張。亂黨雖已誅鋤。而芽蘖之萌。互相倚伏。加以民情屢與普兵爲難。普國時來責備之辭。苟不善應之。釁端立見。爹亞自顧藐躬肩茲鉅任。扶已衰之大局。當新挫之疆圉。歲中度支須五百兆圓。國用已極其難。况乎國政軍政之交迫。民情敵情之相乘。而猥以遲暮精神。爲國家再造。爹亞卽不辭勞劇。恐亦有甚難如願者。其辭職者。想亦迫於萬不得已之苦衷也。噫。忠臣許國。惟盡馳驅。成敗利鈍。非所逆觀。爹亞亦惟竭其鞠躬瘁之心。可已。法人戕殺普國戍兵二人。正兇已弋。獲審訊。謂其時飲酒已醉。適聞普兵詈之爲狗。故不覺忿火中燒。遂拔刃殺之。陪審秉公人員謂。此由忠勇激發。不

得爲罪。立行釋放。首相俾思麥移文詰責。謂此輩兇人。必當以軍法從事。旋臨尼威路鄉。又殺普兵。卽經擒治。正法。其從皆予重懲。法京盛日。每當度歲。赴市購物者。如雲集霧沛。攘往熙來。其熱鬧不可言狀。交衢間樓閣雲連之處。又復絃歌不絕。至一千八百七十一年。除夕光景。大相懸絕。過市者。旣無復肩摩踵接。所購者。亦無珍奇瓌異。卽婦人孺子。裝束樸陋。遠不逮昔。觀者大有今昔盛衰之感。噫。法京富麗甲天下。當其盛日。則豪情勝概。溢於眉宇。迨經兵燹。則闐闐荒涼。人事冷落。兵端之不可輕啓也。如是夫。爹亞謂國會人員云。本國此時外均友睦。內盡肅清。勵精圖治。冀得還昇平之盛觀。欲圖酒恥。卽在此始政維新之際。劉夏者。法王時曾爲首

揆者也。哥錫嘉人。公舉爲國會紳士。法國黨羽殊多。各自分門別戶。其不卽藉黨紛爭者。良以人心方繫於爹亞耳。三年後爹亞去位。其時殆難已於爭鬣。識者憂之。法后出奔時。所攜珍寶甚富。宮扇一柄。價值一萬數千金。扇上飾以珍珠鑽石。悉用衆寶嵌成。牟尼一串。大如指頂。色黑如漆。光可以鑑。朝珠一串。大如蓮子。大小停勻。間珠亦皆非常重寶。其值連城。待價而沽。又有鼻烟壺一。以寶石雕成。而復飾以珠玉。此係內府珍玩。已歷數傳。吁。法后固嘗母儀一國者也。以蒙塵後。宮幃舊物。悉付五都。正所謂得失無常。盛衰轉瞬者矣。能無感慨係之也哉。法國籌辦善後事宜。以國帑支絀。遂議新增稅項。如入口絲茶。所抽甚重。頗拂人心。於是物議沸騰。

初普法盟成。議收國中殷戶。田產歲入之息。以舒國用。時議院公論。亦可其說。總統爹亞力排衆議。謂抽殷戶歲入一欸。我國斷難舉行。蓋我國富家巨室。輸賦已重。玆若再稅歲入之息。則必有所難堪。民無立足。雖此法英國亦嘗行之。然英於平日。稅課較輕。故行之尙可無礙。至於美國行之。則其弊不勝枚舉矣。我國豈可於兵疲民困之後。重行此苛政哉。於是力持不行。其事遂寢。然因籌國用。舍於此。不得不增於彼。重徵入口稅項。原以濟不足也。而人心遂不能平矣。謀國之難。蓋如此。法國尙有亂民。意圖乘機蠢動。十一月十五日。爲前法后千秋華誕。亂者欲借恢復爲名。煽誘法京之民。同時舉事。法廷大臣。先期知之。預爲防維。乃不敢發。此蓋亂黨

之根株。未淨芽蘖潛萌。非大布德化。以湔除而消遏之。無以臻蕩平之郅治也。或謂人心思舊。識者則謂人心思亂也。普法兩國盟成。釋怨各泯猜嫌。歸於輯洽。現在兩國互遣使臣。駐節都中。講信修睦。仍締夙好。法國總統爹亞老成持重。深算遠謀。爲通國人心所欽服。其欲強兵富國。誓雪前耻。奮發有爲。以期振作。故兵額一切。仍如舊制。且加精焉。列國無不知之。竊以爲有報人之志。而使人知之。此危道也。今普國首相俾思麥。果以此爲責問。特遣駐節法京公使晏念伯爵。致書法國。令其裁兵額。減戎備。庶幾相安於無事。否則法國要隘之所。仍當爲普軍所據守。以俟清償賠欸。而後已。凡此蓋欲免法國異時侵伐計也。非有他意。或謂令法減兵之說。

普相並無是言。蓋傳者之妄耳。法國統領爹亞議添兵至一百六十萬。蓋以振國威。張國體也。又復於巴黎斯京城內外。修築礮臺。鞏固勝於前時。爹亞以爲此身在位一日。則法國昇平一日。夫在普國。則方欲其減額汰兵。而在法國。乃務欲增兵益餉。蓋各有所見存也。在法國。果能勵精圖治。一反從前之覆轍。蔚成中興。則歐洲之局。或可支持。而普俄不至於遽逞。黑海雖改盟以後之事。或可無虞也。蔑士天設之險。守蔑士之兵。又多於普國之圍兵。而卒至獻城納款。此巴彥之咎也。即使糧絕援窮。萬不能守。似亦可衝圍陷堅。棄之而他走。以與法京之兵。併力拒普。則普猶不得逞耳。或曰。蔑士之降。少緩須臾。則法京之兵。必能潰圍而出。以與巴彥相合。

然此皆事後擬議之詞。堅城固壘。致失於敵。爲將者又不能死。其罪要不得免。今法臣廷鞫巴彥。已置狴犴。以俟再訊。論者謂法之敗於普也。非由於衆寡之懸殊。守禦之單薄。乃由將士之不用命。其最繫於勝負之大局者。乃在蔑士之議降。師丹之納款。則巴彥雲芬二人。固不得辭其咎也。法國朝廷。已將巴彥前後失守情事。交軍政司。秉公論斷。治以失律之罪。用肅戎行。而作士氣。亦整頓軍務之一端。法國日報。屢責巴彥喪師辱國。罪不容辭。法廷嚴交部議。核其應得之咎。巴彥則謂時勢處於萬不得已。故出獻城下策。以衛民命。如廷臣欲援律定擬。則巴彥將求普國王子爲證。以自明其苦衷。論者謂巴彥固法之名將也。當普法構衅之際。掌握兵符。

指麾衆旅。扼守蔑士險要之地。自以爲兵甲之利。城郭之堅。士卒之盛。定陳固營。莫能侵犯。何期普師一困。勢蹙力窮。內無助。而外乏援。竟至乞降。以獲罪譴。或以巴彥之降。爲非其罪者。亦曲爲之解也。夫兵以練勝。將以智取。或者普王子之謀。殆非巴彥所及料哉。按法將巴彥家世式微。以戰功起家。身列戎行。挽強躍駿。凡遇戰陳之事。披堅陷銳。輒以身先。始由行伍。歷升至今職。統屬文武。總握符節。控制雄師二十萬。可謂處人臣之極地矣。考其升秩之由來。則以往征墨西哥時。厥功獨偉。當法國之割踞墨西哥也。深入敵境。獨駐孤城。而反側者。遍於肘腋。師之存亡。危於旦夕。人皆以爲勢不可勝。巴彥乃慷慨登壇。獎率三軍。卒之一戰而捷。奄有墨境。

及普國軍興之日。法王先授李布父爲大將。及戰而北。軍中若失所恃。皆以爲非巴彥不足安衆心。李布父乃以印授巴彥。退居麾下。聽其指授。以其久著殊勳。素負盛名也。法王復以麥馬韓副之。自此舉國以聽巴彥。國祚之興衰。三軍之成敗。皆繫於巴彥一人。而又令守蔑士一城。此固天設之險也。授以驍騎十六萬。以主勝客。以逸待勞。制敵之功。可得之操券。不圖普兵甫交。敗機已兆。智窮力竭。受困長圍。未聞有舉旗斬將之功。徒知有納地獻城之舉。辱國喪師。一蹶不振。旁觀者方料巴彥必以馬革裹尸。畢命疆場。必不作降將軍也。乃不意出此下策。遂以通謀於普國疑之。法廷以民心所背。不得不加推鞠。初巴彥賜第。卽在王宮之左。輪奐崇華。棟

宇峻麗。朝廷下詔宣赴。當對案之日。土木之功。猶未藏事。巴彥乘車至第。周視工程。百憂感心。因命巡捕官往謁兵部。詢以此事如何。兵部曰。無恐也。請巴將軍俟七日來。巡捕反命。至日。巴君命駕速赴候訊。雖妻孥無有知者。復以乘車滿載輿圖。日與律師講論地形。辨其地難守易攻。庶讞訊之時。得以自明素志。法國待功臣。頗有殊恩。雖受禁。亦無所苦。若已成定讞。置於極典。則入市行刑。轟之以鎗。法國前人乃利大帥。曾有行之者。所以爲不忠者警也。巴彥之罪。或恐不至是也。論者又謂。巴彥素以名將稱於一時。人皆仰其老成持重。具有深謀。及與普戰。職掌元戎。身當大敵。困守蔑士。莫展一籌。卒至棄甲倒戈。獻城納款。普法既和。釋俘講好。巴彥仍

得歸鄉里。見父老。幾以爲得軼於法外矣。廷臣有追咎當日之事者。謂軍法在不可廢也。於是控巴彥者紛起。或有謂其通款輸情者。事聞於官。已九閱月。特尙未鞫訊。惟幽之於一室中。禁勿使出。日以五人。夜以十二人。爲之防衛。蓋慮其懼罪遠颺也。法國朝廷之未欲遽行審訊者。因欲先期備集供詞。使凡控之者。均得至於訟廷。藉以徵其是非曲直之所在。久之。凡得證人一千有四十人。惟可濟於事者。僅四百八十人而已。此原告之證人也。被告亦有證人十五六人。皆營弁也。此外尙有字跡可爲確據。所集證人供詞。累牘連篇。已盈三百五十紙。無論審駁證人。但令鞫時當堂宣讀。亦須歷多時。其惡巴彥者。則曰。咎無可辭。罪有應得。其在行伍之兵。

普法軍紀卷十三
人軍營之員弁。平心以處事者。則曰。巴彥疑若無罪也。憎之者。則曰。巴彥誠一奸慝耳。輸情通敵。賣國求榮。名爲守蔑士。實則非耳。徒令荼毒生靈。妄置三軍於死地。與普國之郡王大將。無不深相結納。常潛往普營。傾襟坐論。先行通款。而後獻城。凡此訛詞。謬說。衆無不信爲然。不知普郡王之圍蔑士也。深濠堅壘。消息不通。雖飛鳥伏鼠。亦難以潛度。巴彥豈能出入普營。若是之自由哉。更有一說。謂巴彥當擊敵兵時。以礮攻燬其所據之城。司礮者專向城中一屋宇攻之。彈丸橫飛。勢若驟雨。一時方資得手。乃巴彥忽從而止之。人皆曰。此卽通敵之一端。然事非無故。是屋乃普之醫館。普法兵皆在礮擊之。已中數處。病人之傷殞者無數。普郡王因發書罷

戰。請巴彥體恤病兵。勿擊醫館。巴彥從之。故諭止礮。國人責之。以爲不宜與敵人互通音問。應斬其來使。以示威而告絕。又曰。應令敵使徒手而返。不必加以禮貌。更命急擊此屋。勿失。或有詢之者。曰。然則病人將若何。曰。聽諸天命而已。幸者免。不幸者亡耳。總不得與敵人通聞問也。所控巴彥諸款。最異者。則褒巴奇將軍在蔑士城外之戰。是時兩軍鬪酣。其勢方急。法陳中忽爾金聲大作。傳令退兵。褒巴奇遂不得已。撤隊回守礮臺。而法之軍威。遂以此挫。嗣後迭次敗北。一蹶不振。職此之由。或詢其何以收軍。褒巴奇則曰。當戰時。有巴之巡弁至。告之曰。巴彥有令退兵。巡弁亦曰。巴彥確有是命。且曰。其發此令。非止一次。巴彥證人則曰。巡弁聽聞未審耳。

蓋巴彥所發之令。命褒巴奇堅守。此二者孰是孰非。須經研鞫。然後乃得剖斷。又有控巴彥者。則曰。糧未絕而先降。顧斯時也。兵士皆殺馬以充饑。此則糧絕。顯然可據。督糧員弁控之。則謂。蔑士所存麥麵。尚可支半月。軍中雖殺馬為糧。而廐中之馬。猶可供烹宰。何遽出於降也。巴彥之證人。則曰。馬雖未罄。而饑卒日多。無不枵腹以從事。所餘僅七日糧耳。此外軍士多攪疾患。幾於病莫能興。故不得已。而出於降也。斯二人者。皆各持一說。卒莫能定。要之。此案非一時所能竟。片言所能決。時乎不利。辰命不猶。敗軍蹙國。關繫非輕。巴彥其如之何哉。

一千八百七十三年夏。麥馬韓繼為統領。爰議巴彥一獄。刻期鞫訊。普郡王遣書巴彥。願赴案。作質證。巴彥不可。蓋以借重於敵國之人。則益為己國所忌耳。按法之敗於普也。獻城納款。望風潰降者。不知凡幾。而最關至要者。有二所。一曰蔑士。一曰師丹。曾委廷臣為之公議。巴彥答無可辭。囚禁囹圄。當櫻重罪。雲芬甫爾接印視事。其時已不可為。故得薄責而釋之。

二者所斷。要皆協於輿情。即從局外之人觀之。亦無不以為然也。巴彥始降。謾曰。有奇計在。可以轉敗而為功。如曹沫之登壇劫主。姜維之白棹抗卒。乃既降之後。絕無所展。施束手困待而已。所謂奇計者。安在乎。徒託空談。竟成畫餅。適足令人齒冷耳。 法國有日報。曰。拂嘉兒。嘗論及大將軍杜祿蘇往事。謂其曾矢誓詞。竭忠盡瘁。以保法后。厥後棄之如弁髦。其食言實有媿於荀息。并有誣讒宮闈語。杜祿蘇見而惡之。謂其謗己也。控之公庭。對質時。赴案。為杜祿蘇辨證者林立。麥馬韓亦與焉。略謂。僕當領兵時。杜君力保法京。使當日者。退駐法京。以資屏衛。此為上策。繞道師丹。出援巴彥。此為無策。是固非僕之素料。僕以不得行其志。遂至決裂。不可復救。杜君之竭慮匡扶。亦未嘗稍改前度。奚可坐以食言。自餘赴證者。無不為杜祿蘇辯。鞫訊既明。乃罰日報館。佛狼三千枚。監禁囹圄一月。以為訕謗者警。杜祿蘇於普法交戰之

時曾任副總統。百折不撓。雖危在旦夕。而不顧。當國人力舉杜君。肩茲艱鉅。時杜君慨然不辭。以爲己任。事平辭職。家居。角巾布衣。飄然物外。絕不知前日之從矢鏑中來也。斯可謂不羨榮祿。自全其天者矣。法廷特簡發孚。爲駐劄南亞美利加布。拉士國公使。職卑俸薄。似有置散投閒之意。議者以爲普法之戰。發孚歷患難而不驚。經艱險而愈奮。苦節孤心。照耀國人耳目。今起自田里。而授此任。當非所以待勳臣之道也。或謂此必有因。局外之人。必不能測局中之事也。或議其門以內有慙德。特人言殊未足信也。然終爲發孚惜耳。普法啓釁。人皆歸咎於駐普公使邊尼德體。因其無禮於普王也。於是持論者謂使臣身駐普京。豈不知普國士馬爲何如哉。其運籌者。算無遺策。備前

驅者。皆有揮叱八極。凌厲九州之概。以久經訓練之衆。出而馳聘。誠難乎其爲禦。卽法朝廷銳欲啓釁。爲臣者亦當上書勸阻。告以普之難與力爭。而爲之釋怨講好。然後外固疆圉。內振國勢。克勵雄圖。與敵無間。此出駐外國公使。所以爲朝廷耳目之寄也。乃觀於法公使。則殊不然。知普之不可與敵。而不以入告。知法之必欲與普敵。而弗爲進勸。卒至法一蹶而不復振。是猶以瞽相瞽也。法廷之不能知彼知己。猶瞽而已。乃導之者。絕不示之以平坦。惕之以崎嶇。任其直前顛躓。而莫問則瞽者之咎。皆相者有以致之也。法人又謂使臣爲普相所愚弄。偕立密約。至以法爲各國之怨府。幾於無可置喙。普相之視法公使。蓋侮玩之。等於戲場之傀儡。故法人

無不追咎於使臣。倘法使臣默然忍受，則紀普法之戰者，原其兵禍之所由起，必以使臣爲厲階。卽他日筆諸史冊，亦不容稍有恕辭。然法公使邊尼德體固有辭也。普法事平之後，曾輯一書，自明己志。其書曰：使普錄。凡數十餘萬言，往來公牘皆在其中。其自辨大旨謂：普法之役，原非法王所欲興。蓋王本不欲輕動甲兵，奈下院持議奮激民心，法京之黨欲乘此大役，伺機以行篡竊，故衆心憤恚，若火然泉沛，不可遏制。法王乃不得已，與普構兵。至西班牙議立普王子爲國君一事，則皆不能出普相之所測。料其謀已非一日。多方羅織，而使西班牙入其元中。其志不徒在普王子，得王於西班牙國中已也。務欲乘間蹈隙，與法爲難。我於一千八百六十九

年，曾密白於朝，謂今日普之士馬大備，軍令一出，其發捷於風行雷厲，萬一與法戰，則南北日耳曼必爲之助。蓋我已明燭兩國之機，而言之無所隱矣。去年七月七日，得總理外國事務大臣嘉刺門書。以下所云書牘往來皆以電報傳遞，謂已行文至奄士。往彼展閱，可視此以設施翼午。我卽由威耳畢馳赴奄士。自是日至十四日，皆駐於奄士。此數日中，卽普法啓釁之期也。我甫抵奄士，卽啓閱嘉刺門來書。略謂西班牙擬立普國王子，事在必行。今王子卽爲西班牙君矣。普王苟置之勿論，宜破其狡謀，阻之使不得成。午後催文迭至，謂必得普王一言。否則法國卽日備兵出境矣。是日，普王召赴讌集。席間普王言及我國王子，西班牙欲立之爲王。我已許之。蓋我所主持者，乃家

事。非國事。故以一家之主允之。非以一國之主允之也。王子與西班牙本同支派。故有是舉。然此私事耳。無涉於公。邊公使遂言於普王曰。法國之人。但計貴國王子入主西班牙。初不暇辨其爲一家一國也。貴國若允敝邦所請。罷議勿行。實感大王之德於無既。普王曰。王子往君西班牙。於法國國體。亦復何傷。但當與王子父商之。若有所言。卽當相告。若貴國嘉刺門之措詞。則殊爲忿激矣。十日。嘉刺門飛遞急音。謂普王若無報命。卽當集兵境上。斷不使普國先我著鞭。薄暮羽書又至。謂必有以報下議院。我亦飛章馳奏言。師旅不可輕集。兵端不可輕啓。誠知民心旣激。雖欲罷而不能。夕見普王。知未得王子回翰。容俟詰朝。翼晨而迭催之命又下矣。謂

是事刻不容緩。已集大兵三十萬布於境上。普王若不知相度機宜。俾王子入主西國之舉。卽行罷議。則我兵於旦夕間。卽在禮吳河上。斷不若壞之爲普所先也。十一日。又謁普王。則謂可俟一二日。旋云。我知貴國兵已大備。然我斷不坐待爾兵之入境也。在我惟冀輯和耳。如寬以時日。當如所請。我於是馳奏於朝言。普王所許王子立爲西班牙王者。乃一家事。非一國事。事必不成。但不能立達耳。十二日。嘉刺門致書於我云。國事家事。分析何爲。但令其不爲西班牙王。斯已耳。迭次函催。急如星火。是晚。法京之民。皆知普國王子不復入主西班牙矣。普王召我入見。謂王子不願君臨西國。已如所請。余懷甚爲喜慰。我亦竊料。是事已了。後據郵報之言。謂

法國民心奮激。必欲一戰而後快。已如機發。不可復制。十四日。嘉刺門書至。言普王當使王子嗣後永不爲西國主。我覺其言殊不近情。入告普王。普王却之。謂明日請相見也。於時催函復至。謂普王所許。法國民心未以爲足。必至後日無虞。方可息兵。講好。普王若不置詞。卽作不許論。翼日往謁普王。普王辭不接見。特遣近臣傳諭云。是事久已罷議。無容贅言。十五日。我卽奉命返國。普法構兵於是成矣。此卽兩國啓釁之所由來也。今以邊君所輯之書觀之。普法失和釀變。使臣殆不任受咎也。邊君又云。普法密約。亦非無所自也。一千八百六十六年。普方擊壤。普相謂法國若不興兵助壤。事平當酬以禮。吳河上之地。普旣勝壤。乃往索地。普相諉云。此地

當敵國要衝。不能相授。不如以兵助貴國。往取比利時。藉以爲報。於是同立約稿。斯時法國瞻前顧後。慮比利時乃英國藩籬。苟或進攻。英必相助。因辭普不取。而請助兵以攻魯星勃。普相又不許。其事遂罷。當立約取比利時也。其謀皆出於普相。我不過隨聽隨書耳。其稿乃爲普相攜去。普法釁成。普相卽以此約刊諸日報。傳播諸邦。使怨毒叢於法焉。按法使臣之智略。實遠出普相下。普相機杼從心。風雲在口。無論法不欲取比利時。卽使欲取。普相豈眞能相助哉。觀其許以地而不授。請助兵伐魯星勃。而不從。則其詭譎詐諛。亦可見矣。使臣不察。漫與書約。使筆跡竟入普相之手。貽以口實。而失鄰歡。疎忽之咎。殆屬難辭。普法之役。英疑法居心叵測。而

竟坐視不援。法因英之不助。怨其失唇齒相維之誼。而憤英之不義。皆此約隱貽之害也。普相之謀亦狡矣哉。普相俾思麥。以所辨論。附刊日報。蓋以答前任法國使臣邊尼德體之書也。法使則云。密約之謀。皆出於普相。普相則謂。法豈無意於立密約哉。當普軍入法京時。曾於聖克流行宮。檢獲法國往來奏牘。中有言及密約事者。特援以作據。俾知密約之出自法人云。

